

萬有文庫

第一集一千種


王雲五主編

陸放翁集

(二)

陸游著

商務印書館發行



陸放翁集

(二)

陸游著

國學基本叢書

陸放翁集

渭南文集

卷第十一

賀禮部鄭侍郎啓

恭審筆橐陸華資論思於禁路。絲綸出令兼潤色於皇猷。共知儒術之益尊。孰謂太平之無象。恭惟某官好是正直。擇乎中庸。大册高文。固已寫之琬琰。崇言欲議。皆可質於鬼神。殆將與日月而爭光。奚止當雷霆而獨立。惟上聖克勤於總攬。察羣臣各盡於才能。謂其代予言。既久煩於鴻碩。求能典朕禮。宜無易於老成。況以南省之要司。仍寓西垣之舊直。惟時異數。實冠清途。然而文關國之盛衰。官以人而輕重。籲俊尊上帝。豈止在玉帛鐘鼓之間。斂福錫庶民。其必有典謨訓誥之盛。視古無愧。非公而誰。所冀復如三代禮樂大備之時。抑亦追還兩漢文辭爾雅之體。顧雖老矣。尙及見之。

答撫州發解進士啓

士論推賢。方恨定交之晚。鄉書擢秀。遽勤授贊之恭。恭惟某官。與學海涵。英姿玉立。山川信美。生大儒名世之邦。絃誦相聞。陶聖主右文之化。將鵬搏於宦海。姑鴻漸於名場。某偶此乘軺。遂叨勸駕。宸廷射策。豈惟慶榜帖之馳。藏室讐書。尙及見雲霄之舉。解魁云藉。甚聞名。方恨定交之晚。褒然擢秀。遽勤授贊之恭。

賀施中書啓

伏審蓬壺清閬。早冠羣仙之遊。詞掖高華。旋觀一佛之出。得人之盛。吾道有光。恭惟某官秉德醇明。宅心夷粹。高文大冊。非復騷人墨客感寓之詞。崇論欲言。盡得宗廟朝廷嚴重之體。久矣絕世而獨立。固難袖手而旁觀。況今聖政之新。方建太平之業。推明天子惻怛愛民之旨。開慰海內奔走鄉化之心。德意達於四夷。號令婉乎三代。清議所屬。匪公而誰。且甘泉均號於從臣。而西省獨稱於政本。國僑潤色。雖概取儒學之長。山甫將明。必深通天下之務。正官名者蓋已百祀。稱職業者凡有幾人。戛乎其難。理若有待。動心駭目。自茲觀大手筆之傳。削牘濡毫。又當慶真學士之拜。

上丞相參政乞宮觀啓

年運而往。益知涉世之艱。職思其憂。獨幸侍祠之樂。惓惓微志。懇懇自陳。伏念某擁腫凡材。聱牙曲學。既無甚高論。足以譁世。豈有它繆巧。用以致身。隨牒半生。問津萬里。雖誓圖微報。不勝狗馬之心。而俯迫頽齡。已罹霜露之疾。壯志纍然而欲盡。殘骸悴爾以難支。拉朽摧枯。競爲排陷。哀窮悼屈。孰借聲光。敢圖廊廟之尊。未棄門闌之舊。曲憐不逮。力謂無他。至於跌宕之文。辱在褒稱之域。二百年無此作矣。固難稱慚。於獎知。萬戶侯豈足道哉。私亦激昂於衰懦。然而揣數奇之薄命。懼徒費於鴻鈞。與其度越羣材。留朱雲於東閣。曷若稍捐薄祿。置陶令於北窗。伏望某官仁風翺及物之恩。赫日照覆盆之陋。念前跋胡而後寬尾。惟當自屏於江湖。方上昭天而下漏泉。忍使獨擠於溝壑。假以毫端之潤。寵其林下之歸。某謹當刻骨戴恩。剝心慕道。誦丹臺之蕊笈。少尉素懷。拜玉局之冰御。用華晚景。

知嚴州謝王丞相啓

故里浮沉。竊玉局再期之祿。公朝拔拭。付桐江千里之民。瓜戍非遙。竹符甚寵。感淪病骨。愧溢衰顏。伏念某元祐黨家。紹興朝士。池魚淺瀾。本思自放於江湖。社櫟支離。久已難施於斤斧。繇治生之素拙。因從宦以忘歸。頃自吳中。久留劍外。顧彼衣冠之所萃。頗以文字而相從。方深去國之悲。敢有擇交之意。流偶殊於涇渭。風自隔於馬牛。昨眦見憎。本出一朝之忿。排擠盡力。幾如九世之讐。藐是羈孤。孰爲別白。縱免投荒之大罰。亦宜置散以終身。且定遠未歸。惟望玉關之生入。輕車已老。猶護北平之盛秋。豈有朝爲閭閻廢斥之人。暮竊畿輔承宣之寄。茲蓋伏遇某官學窮宇奧。勳塞堪輿。南山巖巖。冠公師之重任。赤鳥几几。同宗社之閔休。念人才之實難。悼士氣之不振。挺陶至廣。收拾無遺。方與物以皆春。憫向隅之獨泣。變和輿論。闊略彝章。起安國於徒中。較恩未大。還管寧於海外。爲力尙輕。而某少非列於通才。晚徒專於樸學。棄雞肋而猶惜。雖仰戴於深仁。續鼻脛則自悲。恐難逃於薄命。

謝梁右相啓

故里投閑。久竊奉祠之祿。清時起廢。遽叨出守之榮。挈於九折之途。置之一飽之地。感深至骨。涕溢交頤。伏念某鄉校孤生。京塵下吏。學徒盡力。徐而察之。則鶴退飛。仕已冥心。非敢後也。而馬不進。頃者南遊七澤。西上三巴。繆見推於文辭。因頗交其秀傑。愛憎遂作。譽毀相乘。肆爲部黨之讒。規動朝端之聽。雖漸能忍事。聽唾面之自乾。猶競起浮言。至擢髮而莫數。湏洞風波之上。流離道路之旁。幸逢曠日之中天。固宜潦水之歸壑。矧此江山之郡。介於吳越之間。先世嘗臨。尙有召伯憩棠之愛。提封甚邇。僅同買臣衣繡之歸。叢爾何堪。居然非稱。此蓋伏遇某官身扶昌運。手幹化鈞。一氣鳶魚。咸遂飛潛之性。衆材桷桷。各安小

大之宜。俯憐爨下之餘。嘗沐筆端之潤。摧頽雖久。省錄未忘。謂人士舍之則藏。固當慕昔賢顯晦之節。然朝廷養非所用。何以待異時緩急之求。既啓迪於淵衷。遂變和於輿論。而某年齡抵此。意氣蕭然。律召東風。雖幸春回於寒谷。手遮西日。敢希身列於修門。

謝周樞使啓

起由散地。付以名州。朝迹久疎。忽喜長安之近。戍期未及。先寬方朔之飢。靖言孤蹤。可謂過望。伏念某。簞瓢窮巷。土木殘骸。早已孤危。馬一鳴而輒斥。晚尤顛沛。龜六鑄而不成。羽翮摧傷。風波震蕩。薄祿作無窮之祟。虛名結不解之讐。鄙生自謂非狂甚矣。見知之寡。韓愈何恃敢傲。若爲取怒之深。乘下澤之車。忽過半生。掛神武之冠。今無多日。偶然未死。得此少伸。制出西垣。地連右輔。顧視必恭之梓。阡陌相望。封培勿翦之棠。鄉閭太息。此蓋伏遇樞使丞相。學優聖域。道覺民先。卓爾爲衆正之宗。毅然開孤進之路。自太公已久。望子仰關。宗廟之靈。有夷吾可無復憂。盡釋薦紳之慮。方廣求於雋傑。乃首記其姓名。生物功深。奚啻吹律召東風之妙。回天力大。未覺挾山超北海之難。而某少頗激昂。老猶矍鑠。志士弗忘在溝壑。固當堅馬革裹尸之心。薄福難與成功名。第恐有猿臂不侯之相。

謝黃參政啓

病餘揣分。蘄續食於叢祠。望外疏恩。俾牧民於近郡。感深雪涕。慚劇駢顏。伏念某。早歲多艱。晚途益困。岷嶓巉絕。身行禹貢之書。雲夢蒼茫。口誦楚騷之句。未葬支離之骨。辱招羈旅之魂。八千之路。雖還五十之年。已過視荒荒而益廢。髮種種以堪哀。斷港絕潢。徒有朝宗之願。朽株枯木。何施造化之功。雖存溝壑之

餘生。已是簪紳之棄物。驚宿愆之盡洗。知孤迹之少安。如絲如綸。命出西垣之潤色。有民有社。地連右輔之封圻。矧復嚴瀨遺祠。桐山故隱。企高風之如在。顧俗狀以自慚。此蓋伏遇參政相公。黼黻皇猷。權衡國是。衆仰規模之大。天知議論之公。謂設廉恥以遇羣臣。士斯自好。且蹈仁義則爲君子。人亦何常。務與惟新。不求其備。某謹當銘膺感德。擢髮思愆。弱羽遶枝。姑低回於晚景。靈丹點礫。儻邂逅於初心。

謝施參政啓

起由散地。畀以專城。命出詞垣。仰戴絲綸之寵。名居節鎮。俯慚章綬之華。傴僂拜恩。謔諄敘感。伏念某薄才綿力。多病早衰。竊慕長者之餘風。每思砥礪。未聞君子之大道。徒益顛危。零丁稷下之遊。寂寞漳濱之臥。尙無漂母。哀王孫而進食。況有故人。憐范叔而贈袍。牛欲釁鐘。誰其弗忍。婦非束緼。何以自還。敢期累年不振之蹤。忽有一旦殊常之遇。光生分表。喜溢情涯。惟茲山水之邦。自昔詩書之俗。脩門在望。曾無日近之嗟。先世嘗臨。獲慰露濡之感。此蓋伏遇參政相公。至仁善下。盛德兼容。一引坐。一解顏。士託終身之重。三吐哺。三握髮。野無片善之遺。賢能借勢以騫騰。孤遠望風而傾屬。自悲蓬梗。獨遠門闌。向使不爲萬里之行。固亦久在諸生之末。誦文章於方冊。竊喜得師。聞道義於薦紳。亦嘗願學。旣積精誠之至。果歸甄治之公。旅進無階。歎空馳於清夢。餘年有幾。懼終負於初心。

謝臺諫啓

賁念代耕之祿。懇乞奉祠。恩開使過之門。復令治郡。方窮閭之待盡。非公議而疇依。慚極駢顏。感深雪涕。伏念某遭回薄命。顛賴餘生。肄業荒唐。小學僅通於蒼雅。屬辭卑弱。奇文徒慕於莊騷。髮種種以將童。心

搖搖而欲折。食粥動逾於累月。陳絺或至於隆冬。不能引分以掛冠。廉隅已喪。更復貪榮於懷綬。愧懼可知。況此名城。今爲近輔。九霄嘉氣。日未邇於長安。千載遺祠。星嘗從於帝座。孰爲之地。使有此行。茲蓋伏遇某官偉量海涵。英姿山立。正言云。義急嘯枯。仁先念舊。衆惡之而必察。俯憐久困於風波。今老矣而無能。尙使少紓於溝壑。爲國廣旁求之路。示人無終棄之才。曾是妄庸。曲蒙全護。除書已下。徒叨湔洗之恩。羸疾益侵。無復激昂之日。

謝葛給事啓

杜門訟六十年之非。久安散地。起家忝二千石之重。忽奉明恩。驚蠶垢之漸除。扶衰殘而下拜。舍人云。起自窮閭。叨臨近郡。爲農爲圃。三年之穴不治。如絲如綸。一字之褒過寵。伏念某學由病廢。仕以罪歸。冥心鷄鷲之行。投迹雞豚之社。海三山之縹緲。釣鼈已媿於初心。楚七澤之蒼茫。殢咒亦成於昨夢。但欲負來慕許行之學。豈復叩角歌甯戚之詩。偶逢公朝使過之時。躡畀近郡承流之寄。所蒙過矣。自揆茫然。天際鬱葱。望九重之雲氣。道周蔽芾。掃四世之棠陰。得遂此行。孰爲之地。此蓋伏遇侍講給事道本文王之正。學師孟氏之醇。騰茂實而蜚英聲。久隆上睇。息邪說而距詖行。遂擅儒宗。方與萬物而皆春。不忍一夫之獨泣。某偶階末契。遂借餘光。舍人云。議論四方之望。文章百世之師。餘談激水之斗升。窮鱗悉逝。麗藻生靈於膚寸。甘澤無窮。方與萬物而皆春。不忍一夫之獨泣。而某適有懷章之幸。首叨此筆之榮。雖飯豆羹。藜不敢望功名於老大。然書紳銘座。尙思復玷缺之艱難。

答交代陳判院啓

病求玉局。但懷優游卒歲之心。恩畀桐廬。獲繼超軼絕塵之迹。方自嫌於通問。乃遽辱於移書。公真快哉。我則陋矣。伏念某少而落魄。老益迂疎。顛顛關河。萬里客岷嶓之境。馳驅節傳。三年使閩楚之郊。迨此退歸。頽然遲暮。投幘已安於蟹舍。起家忽奉於魚符。此蓋伏遇某官秉節以貫四時。瑞世而翔千仞。經行早推於庠序。謀猷晚著於朝廷。謠誦上聞。豈獨最列城之課。規模甚遠。又足爲來者之師。某偶幸懷章。遂將接武。雖取棄竹馬。望英躅以增慚。然獲舊青氈。在衰門而甚寵。發春伊始。坐歎多閑。願遵輔養之宜。卽慶禁嚴之拜。

嚴州到任謝王丞相啓

懇求祠祿。乃叨便郡之除。甫及戍期。亟奉燕朝之對。身旣復歸於鈞播。衆知未棄於明時。伏念某淺智褊能。薄才綿力。棲遲屏迹。但欲射猛虎以終殘年。辛苦著書。不足藏名山而俟後世。偶爲貧而求仕。旋觸罪以免歸。雁食無儲。鶉衣不補。凡百君子。悠悠非特達之知。平生故人。往往處嫌疑之際。欲言誰聽。投老奚歸。豈期廟堂任使之公。挈出溝壑漂流之地。此蓋伏遇某官孟韓道統。伊呂王功。黼黻聖猷。謂言之不文。則行之不遠。甄陶士類。每捨其所短。而取其所長。慨念孤生。已侵暮境。儻使抱所聞而不試。則將齋遺恨於無窮。何止屢陳於斧屨之前。蓋亦昌言於搢紳之上。故雖久斥。亦復漸收。而某已知悔童子之雕蟲。未免守古人之糟粕。決無可用。寧不自知。續鍾釜之祿。以待掛冠。嘗面祈於大造。効尺寸之勞。而垂汗簡。悵永負於初心。

謝梁右相啓

玉局二年已竊代耕之祿。桐廬千里復叨起廢之恩。望睟表之顛昂。撫編氓之繁夥。退惟忝冒。徒積兢慙。伏念某四壁寒家。一簞賤士。刻舟求劍。固匪通材。懲羹吹壺。已消壯志。比由蟹舍。起領魚符。永言久斥之餘。亦有少伸之望。然而察簿領稽違之細。撻吏胥隱伏之微。一皆非其素知。又不可以遽習淵明之寄事。外已迫頽齡。安國之擢徒中。曷勝煩使。此蓋伏遇某官才全經緯。氣塞堪輿。博取衆材。屢抗延英之論。宏開公道。靡須光範之書。施及妄庸。未忘夙昔。溫飽一門之衣食。洗滌累歲之罪愆。使爲全人。以畢餘日。某敢不好是正直。擇乎中庸。戒舞智以賊民。寧取椎魯少文之誚。務盡心於折獄。庶無冤枉失職之嗟。苟不辱知。其敢言報。

謝周樞使啓

入望清光。出臨近郡。天威不遠咫尺。旣諧就日之心。父命惟所東西。況被牧民之寄。感恩至矣。揣分茫然。伏念某下愚難移。大惑莫解。不能高飛遠舉。求避橫目之民。乃復直情徑行。自掇噬臍之悔。永言窮薄。數蹈遛回。毀靡待於德高。災非由於福過。斷雲零落。敢懷出岫之心。病鶴雛雛。忽忝乘軒之寵。此蓋伏遇某官道窮矣奧。氣塞堪輿。南山之石巖巖。帝資宿望。綈袍之意戀戀。士感誠言。哀細德之嶮微。開鴻鈞之塊。坻念茲積譴。雖擢髮而有餘。察彼衆讒。亦吹毛之已甚。未加顯棄。聊復少收。雖不在於英材樂育之中。實創見於薄俗相挺之際。而某扶衰自笑。迫老宜歸。無復入關。西日舉釣竿之手。惟希度世。東封謁玉輅之塵。傾倒具陳。慚惶無措。

謝臺諫啓

挂洪景之衣冠。宜還故里。懷買臣之印綬。尙冒明恩。觸熱卽途。扶衰領郡。伏念某身常短褐。家本衡門。一官惟妻子之謀。萬里極關河之遠。景翳翳以將入。餘日幾何。芳菲非其彌章。素心空在。比者竊冰銜於玉局。築雲屋於鏡湖。惟俟引年。遂將沒齒。散地方蘄於因任。除書忽畀於專城。宮闕中天。有就日望雲之幸。鄉閭接壤。逾過家上冢之榮。此蓋伏遇某官望重朝綱。學通國體。收真才於水落石出之後。坐銷浮僞之風。察定理於舟行岸移之時。盡黜讒誣之巧。稍收久廢。用示至公。某謹當勉効微勤。堅持素守。吏犯法而法在。先務去奸。政近民則民歸。敢忘用恕。或竊逃於大譴。庶少答於深知。

謝監司啓

挂洪景之衣冠。宜還故里。懷買臣之印綬。尙冒明恩。觸熱卽途。扶衰領郡。伏念某身常短褐。家本衡門。一官惟妻子之謀。萬里極關河之遠。景翳翳以將入。餘日幾何。芳菲非其彌章。素心空在。比者竊冰銜於玉局。築雲屋於鏡湖。惟俟引年。遂將沒齒。散地方蘄於因任。除書忽畀於專城。宮闕中天。有就日望雲之幸。鄉閭接壤。逾過家上冢之榮。此蓋伏遇某官學貫經邦。望隆國器。繡衣持斧。姑小試於使輅。豹尾屬車。卽超登於禁路。尙容衰賴之迹。暫託澄清之餘。某謹當勉効微勤。堅持素守。吏犯法而法在。先務去奸。政近民則民歸。敢忘用恕。或竊逃於大譴。庶少答於深知。

答方寺丞啓

年運而往。悵久隔於英遊。道阻且長。忽恭承於榮問。情文甚寵。衰晚增光。伏念某笠澤漁家。紹興朝士。捫參歷井。久困客遊。煮海摘山。屢乘使傳。旣罪愆之未洗。復衰疾之相乘。骨相宜窮。頭顱可揣。穿延和之細

仗恍若隔生。分新定之左符。更叨起廢。此蓋伏遇某官義存推轂。德重匿瑕。哀其顛頓之百罹。借以揄揚之一諾。遂叨共理之寄。亦及歸耕之餘。而某緣病廢書。迫貧隨牒。能古文何用於今世。徒慚長者之見知。居是邦不非其大夫。殊匪小人之所望。佇奉丁寧之誨。用寬瘳曠之虞。

賀王提刑啓

恭審繡衣玉節。肅王畿風憲之嚴。寶畫奎文。新內閣圖書之直。方攬澄清之轡。已騰謠誦之聲。恭惟某官學道愛人。至誠格物。德秉民彝之粹。才推國器之英。中外踐揚。自際風雲之會。始終操履。靡移金石之堅。將階言語侍從之除。洊被禮樂光華之遣。欽恤副九重之指。平反奉一笑之春。始訖外庸。卽躋近列。計乘輶之未幾。旋頒詔以趣歸。某意廣才疎。心勞政拙。伏櫪志在千里。悵暮景之已侵。巢林不過一枝。幸卑棲之有託。

與汪郎中啓

去蜀歸吳。已侵尋於晚境。乞祠得郡。尚記錄於明時。夙戒行臚。已臨弊邑。方竊依仁之幸。敢稽告至之恭。伏念某笠澤農家。紹興朝士。捫參歷井。久困客遊。煮海摘山。屢乘使傳。旣罪愆之未洗。復衰疾之相乘。骨相宜窮。頭顛可揣。穿延和之細仗。恍若隔生。分新定之左符。更叨起廢。恭惟某官義存推轂。德重匿瑕。哀其顛頓之百罹。借以揄揚之一諾。遂容共理之寄。亦及歸耕之餘。而某扶憊以來。罔功是懼。快景星之先覩。雖尙阻於瞻承。分鄰燭之餘光。遂密依於覆護。其爲慰幸。曷究敷陳。

與沈知府啓

乘傳江臯。偶同一道。分符畿內。復幸鄰邦。公將假道於虞。僕其得御於李。胡交臂而失此。亟削牘而布之。恭惟某官。厚德鎮浮。英姿邁往。富貴固有命矣。未嘗枉尺以自謀。將相豈無種哉。方且搏風而直上。雖仰急流之勇退。寧容袖手而旁觀。果奉明綸。起臨近甸。豐年高廩。想謠誦之已聞。燕寢清香。知文書之益簡。願精調於列鼎。卽歸覲於凝旒。瞻詠之私。數宣曷既。

賀留樞密啓

恭審行玉關之萬里。方喜遄歸。陳秦階之六符。亟聞殊晷。地禁處承明之邃。任崇參宥密之嚴。成命誕揚。師言允穆。切以藝祖鑒五代之弊。不偏重於中書。裕陵新六官之名。亦旁開於西府。豈獨並隆於文武。固將兼注於安危。至以明詔特預於訃謨。尤爲本朝久虛之盛舉。中原多故。首用種忠憲之偉人。聖政方新。則有虞雍公之近事。或名光於竹帛。或位極於廟堂。恭惟某官。躬閔深魁。碩之資。負剛大直方之氣。早推雅望。凌歷近班。以至公服小人。故雖疎而不怨。以大節事明主。故旣去而見思。世方譾譾。以自營。公因落。落而難合。迨此寵光之自至。益知讖險之徒勞。淵乎一心。應彼萬事。七擒七縱。已成服遠之功。三起三留。果有處中之命。方且端委冠鈞衡之位。挽河洗夷虜之塵。復列聖在天之響。攄遺民泣血之憤。某幸身未死。見國中興。材館旁招。雖莫陪於下士。涪溪深刻。尙自力於斯文。

賀蔣中丞啓

伏審顯膺帝制。進總臺評。公道大開。在廷爲之相賀。正人益進。吾國殆其庶幾。仰惟廟社之休。非復門闈之慶。某聞人情不遠。立朝誰樂於抨彈。仕者自謀。干世本求於遇合。皆使從容而徐進。自非怨嫉之所歸。

一居三院七人之官。遂任四海九州之責。至於諫大夫之助成主德。中執法之振肅朝綱。知不可以不言。言不可以不盡。雷霆在上。獨立自如。鼎鑊當前。直趨不避。始也負當世之名。而人不我捨。今也居得言之地。則責將誰歸。卓乎偉人。更此重任。恭惟某官。英姿邁往。奧學造微。論必盡忠。得堪輿剛大之氣。仕常思退。有耕釣高逸之風。位逾達而謙有加。權益隆而量莫測。姑小煩於繩肅。卽進與於弼諧。豈惟斯民被化。於春風和氣之中。亦使多士吐氣於青天白日之下。今其始矣。幸孰甚焉。某嘗辱王翰卜鄰之榮。妄懷貢禹彈冠之喜。崇言劾議。已觀魁磊光信史之傳。過計私憂。妄有一二爲執事之獻。儻少寬於斧鑕。尙嗣布於腹心。

卷第十二

賀賈大諫啓

恭審顯膺一札之敕。首冠七人之選。主賢臣直。國勢歸然。言聽諫行。天下幸甚。某聞昔在本朝之官制。參稽前代之舊章。南臺不置大夫。中憲任紀綱之重寄。北省久虛常侍。諫坡率遺補以盡規。選求旣艱。畀託尤重。故政在中書。而常開言路。事由獨斷。而不廢爭臣。仰觀十一聖家法之傳。茲爲三百年治功之本。繼昔之盛。非公而誰。恭惟某官。學造精微。器函閎遠。許國弗渝於夷險。憂時如抱於渴飢。造膝告猷。浩浩江河之決。傾心愛士。拳拳涇渭之分。慨然死生禍福。不入於中。常若天地鬼神實臨其上。以今日陳善閉邪之效。成異時贊元經體之功。同出此心。夫孰能禦某。侵尋暮景。蹭蹬孤生。迹本甚疎。妄欲依歸於公道。分

當永棄。特蒙拔拭於窮途。何以仰答門闌特達之知。惟有稍陳郡縣利病之實。儻少寬於斧鑕。尙嗣布於腹心。

賀謝殿院啓

恭審顯膺帝制。進貳臺端。手縮衷以逡巡。久已抱獨立無朋之操。髮衝冠而憤切。自茲皆盡言不諱之時。在庭聳觀。有識相慶。伏以御史分職。本以論事任耳目之司。忠臣設心。蓋欲去邪爲宗社之福。抗雷霆而獨立。凜山嶽之不搖。非以近名。固將竭節。天子爲之改容而垂聽。大臣不敢持必而自私。國有紀綱。治自形於四海九州之遠。士篤名義。效或見於數世百年之餘。今茲孰配於古人。識者固歸於門下。恭惟某官道德醇備。議論正堅。灰寒木槁而譽益高。鯤擊鵬搏而才乃見。默究朝廷之利病。盡得源流。徐觀天下之是非。若指白黑。放斥者有愧心而無怨。更革者雖害己而謂然。太平之功。指日可待。某侵尋暮景。踰證孤生。迹本甚疎。妄欲依歸於公道。分當永棄。特蒙拔拭於窮途。何以仰答一見特達之知。惟有稍陳千里利病之實。儻少寬於斧鑕。尙嗣布於腹心。

賀周丞相啓

恭審夢卜襲祥。揚王庭而渙號。典冊備物。熙帝載以宅師。國其庶幾。民以寧壹。實惟宗社無疆之祐。非復門闌旅賀之常。竊以時玩久安。輒生天下之患。國無遠略。必有意外之虞。方今風俗未淳。名節弗勵。仁聖焦勞於上。而士夫無宿道嚮方之實。法度修明於內。而郡縣無赴功趨事之風。邊防寢弛於通和。民力坐窮於列戍。每靜觀於大勢。懼難待於非常。至若靖康喪亂。而遺平城之憂。紹興權宜。而蒙渭橋之恥。高廟

有盜環之逋寇。乾陵有斧柏之逆儔。江淮一隅。夫豈仗衛久留之地。梁益萬里。未聞腹心不貳之臣。文恬武嬉。戈朽鉞鈍。謂宜博采衆謀之同異。然後上咨廟論之崇嚴。非素望之偉然。誰出身而任此。恭惟某官降神維嶽。生德自天。居安資深。學洞六經之韞。探蹟索隱。識窮萬務之微。蓋嘗獨立以常雷霆。何止貴名之揭日月。運籌帷幄。每當上心。端委廟堂。遂持國柄。玉燭肇時和之慶。雲龍協聖作之辰。清末央長樂之宮。將肅六飛之御。築碣石榆林之塞。永奠四夷之封。於古有光。自今以始。某側聞盛舉。實拊歡悰。恤百口之飢寒。豈無竊覲。拔四方之英俊。願付至公。庶未死之餘生。覩太平之盛際。

賀施知院啓

恭審誕布明綸。進專籌幄。用真儒而無敵。翊扶宗社之基。得大老以來歸。開慰華夷之望。恭惟某官英姿邁往。精識造微。居安資深。韞六藝淵源之學。任重道遠。炳兩朝開濟之心。明辯足以折遐衝。果敢足以斷幾事。自初拔用。迄此延登。大節全名。松柏挺歲寒之操。同心一德。風雲協聖作之期。堪輿清夷。星緯明潤。致太平其自此。將魁柄之焉歸。曩暫入於脩門。竊有聞於行路。謂明公之得政。以人物爲最先。自隆師尹。南山之瞻。復見平津東閣之盛。揚庭薦拔。造膝開陳。凡人所難。以身獨任。今雖總本兵之地。願益尸善類之盟。公能以士而報國家。士亦以身而歸門下。某侵尋暮境。顛頓偏州。志氣已衰。無復獻狗盜雞鳴之技。文辭自力。尙能助稗官野史之傳。過此以還。未知所措。

賀丘運使啓

恭審上印帥藩。乘輅畿甸。得人若是。則吾國其庶幾乎。先聲隱然。非俗吏之所能也。公論爲之慰愜。大用

此其權輿。伏以寬猛異施。古今莫一。子產號衆人之母。用於鄭而弗救。陵夷申商爲法家者流。弊至秦而卒以顛覆。歷考簡編之跡。莫先儒術之功。惟蹈君子之時中。斯得古人之大體。方其尊瞻視。正顏色。教化固已有成。雖使空囿畫衣冠。法令其誰敢犯。恭惟某官英姿邁往。敏學造微。夷途早踐於高華。隆委徧當於繁劇。所臨輒治。雖千變萬化而不窮。自守弗阿。終特立獨行之如此。上將引而自近。公其有以告猷。某早陪談燕之餘。誤辱賞知之異。敢圖暮境。獲備屬城。閭里亡聊。每攬涕下。催科之筆。事功靡著。更忍慙修候問之牋。尙加惠於始終。俾羸全於進退。歸依之切。敷繹奚殫。

賀蔣尙書出知婺州啓

恭審解中執法以暫均勞佚。拜大宗伯而入侍禁嚴。雖若不得其言。固亦未爲弗用。乃抗投閑之請。力斬就養之榮。詔諭靡從。藩條初布。上倚承宣之績。士高廉退之風。恭惟某官直哉惟清。淵乎似道。懇款許國。肝膽凜其輪困。慷慨疾邪。山嶽爲之震動。進率由於獨斷。節早見於盡言。未移桑蔭之淹。入繯柏臺之峻。國方增九鼎之重。身已如一葉之輕。魯人獲麟以爲不祥。雖愛憎之叵測。塞翁失馬未必非福。抑倚伏之何常。某幸託里門。獲趨賓席。身世等蒯菅之棄。孰閔餘生。姓名託甄冶之公。尙須異日。

除直華文閣謝丞相啓

秩視大蓬。已竊垂車之寵。恩加邃閣。更叨出綍之榮。初聞道路之傳。猶謂姓名之誤。迨茲被命。重以懷慚。伏念某承學迂疎。稟資葑陋。幼生京洛。尙爲全盛之編氓。長綴班聯。曾是中興之朝士。福未容於盈。皆崇已駭於燒城。西征至岐鳳之間。南戍掠甌閩之境。晚僅升於省闕。旋卽返於鄉關。鶴歸遼天。狐死丘首。蓬

戶十移於歲律。幔亭四閱於祠官。久遂屏居。非始挂冠之日。盡捐半俸。真爲納祿之人。豈期垂盡之光陰。忽玷殊常之惠澤。復緣詔札。併竊身章。里巷聳觀。共仰恩光之下燭。兒孫扶拜。不知衰涕之橫流。茲蓋伏遇某官降命應期。奮庸熙載。神無方。易無體。心獨運於道樞。尺有短。寸有長。士悉歸於鈞播。雖迫崦嵫之景。亦歸塊圯之公。而某意氣空存。筋骸已憊。草具明堂辟雍之禮。雖遭甚盛之時。塗竄清廟生民之詩。其在方來之雋。

修史謝丞相啓

七十告老。誓待盡於山林。尺一召還。恍復瞻於觀闕。內祠祿厚。信史事嚴。容孤迹於其間。知鴻鈞之有自。恭以高皇之盛德大業。雖號中興。而實同開創之難。孝廟之內修外攘。躬享太平。而不忘恢復之志。治躋古昔。威震裔夷。俄屬鼎成之悲。肆修麟止之緒。固已網羅軼事。潤色皇猷。備述巍巍蕩蕩之功。曲盡業業兢兢之指。豈緊遲暮。能與討論。伏念某天子散材。家承孤學。生逢盛旦。蒙六聖之涵濡。身綴清班。被四朝之識拔。常恐脩先於朝露。遂將莫報於秋毫。豈期及耄之餘齡。猥得効勤於大典。茲蓋伏遇某官材全經緯。氣塞堪輿。平生陳謨決策之言。煥乎可誦。十載知人安民之績。底於有成。殊鄰款塞。而奉琛。多士鄉風。而釋屣。內而臺閣。極稽古禮文之選。外而郡縣。有宜民愷悌之風。肇關大公至正之途。不棄偏能一曲之士。故如某輩。亦在數中。謹當益廣見聞。更勤采掇。老驥伏櫪。脩途已非其所堪。小草出山。薄効尙期於自見。

賀謝丞相除少保啓

恭審命出淵衷。廷揚顯冊。人主之論一相。方寄腹心。少保茲爲三公。益隆體貌。傳聞所逮。驩頌惟均。恭以某官謨明弼諧。任重道遠。協天心於崑崙。旁魄之際。動必有成。隆主眷於蠅蝓。變濩之中。言無不用。自登近輔。允迪大猷。疇咨雖首於羣公。謙畏不殊於一日。每稽首而遜稷契。終選衆而舉伊臯。三年有成。四海用乂。農扈告豐。登之候。戎韜臻偃息之期。熙運方興。周召並爲於師保。衆心所繫。平勃均任於安危。是宜大號之繼敷。昭示元臣之同體。羣生成遂。協氣橫流。謹乃憲而屢省。則成。孰測化鈞之妙。本無事而庸人實擾。始知靜治之功。某獲綴清班。欣逢盛事。無好無惡。而遵王路。共欣聖政之大成。不愆不忘。而由舊章。更冀廟謨之無倦。敢効涓塵之助。輒干礎斧之誅。冒瀆實深。兢惶罔措。

賀張參政修史啓

恭審誕布明綸。總提鉅典。固已動鷓鷯行之喜色。而況在牛馬走之後塵。不能自己於寸誠。是敢冒陳於尺牘。恭惟某官自天生德。降命應期。闡溫厚爾雅之文。經緯萬象。蘊超軼絕塵之識。鎮撫四夷。位居台鼎。而有山澤清臞之容。禮絕搢紳。而無王公驕泰之意。心虛靜而觀復。道冲用而不盈。周公太公。方隆夾輔之望。堯典舜典。更專點竄之功。實以袞衣黃閣之尊。下兼蘭臺石室之事。在天三后。巍乎下臨。作宋一經。信矣無憾。某偶蒙簡拔。獲預討論。已侵投老之殘年。何補不刊之信史。仰傳巖之霖雨。幸預在廷。歸杜曲之桑麻。尙勞泚筆。想典刑於諸老。已媿空疎。竭精力於是書。敢忘策勵。

除寶謨閣待制謝丞相啓

冊府秩清。偶至鼇峯之頂。禁途地密。遂穿豹尾之中。雖造化之至公。實恩憐之曲被。欲敍丹衷之感。莫知

雪涕之橫。伏念某雖起耕疇。竊傳家學。書藏屋壁。尚擯斥而不容。跡遞園廬。豈榮華之敢望。虛名作祟。聚謗成雷。幸於先狗馬塞溝壑之前。遂其賜骸骨歸卒伍之請。任子以世其祿。寓直以華其行。固已負未學耕飾巾待盡身還民服口誦農書從故里漁樵之遊。拜高年羊酒之賜。忽從廐置。遽奉詔除。所愧忝大門之官。敢竟奪匹夫之志。惟俟奏篇之御。卽伸告老之誠。簡牘未終。絲綸已降。半生淹泊。沉舟真閱於千颿。一旦遭逢。開印適當於三日。已扶衰而拜命。旋曳蹇以造庭。茲蓋伏遇某官德懋忱恂。化均塊坳。作成士類。兼小大而不遺。勸相皇家。泯異同於無迹。澤東漸而西被。功上際而下蟠。才或取於寸長。罪不捐於一眚。故雖么麼。亦被生成。某敢不頂踵知恩。冰霜勵節。少不自力。坐沉廢者半生。老當告休。悵報酬之無地。

謝費樞密啓

猥被恩綸。躡持從橐。處內閣諛咨之地。繼大門揚歷之榮。揣分奚堪。置慚靡所。伏念某百罹薄命。九折窮途。迹久困於多言。年已侵於大耋。都門屢入。壯遊恍似於前身。册府再來。衆吏多非其舊。識扶衰殘。而就列。刮瞽瞍以紬書。非徒莫揜於旁觀。每亦不勝其自媿。惟竢奏篇之御。卽伸請老之誠。敢謂遭逢。曲蒙識拔。茲蓋伏遇某官道尊皇極。學統聖傳。雖吐哺握髮之勞。曾靡遺於一士。然引坐解顏之遇。顧豈在於他人。每屈崇嚴。不移疇昔。爰自東壁圖書之府。俾躋西清鷓鷯之班。驥伏櫪以悲鳴。曩誰念者。犬舐丹而仙去。今乃似之。某燈火尙親。簞瓢未厭。修世官而不墜。益體上恩。繼家學於寢衰。或傳來裔。庶窺瞑目。無媿初心。

致仕謝丞相啓

優詔許歸已荷乾坤之造異恩及幼更霑雨露之私非公台力假於敷陳則草野何從而甄錄感銘刻骨涕泗交頤伏念某少乏通材晚嬰羸疾史闈八月常懷惕日之慚祠祿三時洊上引年之請初但虞於頽瀆旋曲被於矜從而況從中明降於德音任子特逾於常制桑榆已迫俾華垂白之年豚犬何能遽有拾青之幸里閭歎息門戶敷榮茲蓋伏遇某官降命應期奮庸熙載告猷於內時已措於太平祝鯁在前禮每加於諸老聲靈誠明之學巍巍忠厚之風坐格華裔之寧有光簡冊之載故推餘澤俯及衰門重念穉兒雖非異稟善和之書幸在敢虛棄於光陰太常之第可收尙仰酬於長育

答權提刑啓

伏審抗章請外攬轡入東謂宜因對而復留故欲馳書而未敢遽先垂問莫喻愧心恭惟某官英識造微宏材經遠學術得前言之要議論有羣公先正之風踐揚早歷於清華雖能自見寄任巖辭於叢委刃每有餘茲乃勇退急流旁觀袖手明刑以弼五教誦詩而使四方雖暫試於外庸顧豈符於僉囑還節施於少府行被詔追司筆橐於甘泉孰居公右某退依耕隴密邇臺綱躬豈弟以宜民既蒙賜矣用春秋而決獄行且見之頌詠惟深敷陳罔既

答胡吉州啓

伏以累疏乞歸既拜賜骸之命華牋贊喜更煩泚筆之勞異書憐老學之勤厚幣篤嘉賓之禮顧惟衰悴曷稱眷私伏惟某官絕識超然英聲藉甚簡編插架早推師友之淵源紳佩在廷旋慶君臣之際遇茲暫煩於共理卽歸告於嘉猷而某已返農疇愈除門戟噓枯甚寵徒藏櫝以爲榮詠德雖深愧占辭之莫既

卷第十三

代二府與夏國主書癸未正月二十一日二府請至都堂議

隆興元年正月二十二日特進尙書左僕射同中書門下平章事兼樞密使信國公陳康伯等謹致書夏國主殿下昔我祖宗與夏世修盟好豈惟當無事時共享安平之福亦惟緩急同休戚恤哉患相與爲無窮之託中更變故壤地阻絕雖玉帛之聘弗克往來然朝廷未嘗忘祖宗之志也乃者皇天悔禍輿圖寔歸會今天子紹登寶位慨然西顧宣諭大臣曰夏二百年與國也豈其不念舊好而忘齊盟哉某等恭以國主英武聰哲聞於天下是敢輒布腹心於執事願留神圖之惠以報意當告於上議所以申固歡好者同心協慮義均一家永爲善鄰傳之萬世豈不美歟有少幣儀具如別幅伏惟炤察不宣某等謹白

貼黃前件事宜臣等雖已面陳緣利害至大陛下反覆省覽故敢出具此奏

上執政書辛巳四月

某官閣下文人之在天下用之徒以爲治世之觀大平之飾不用則亦已耳非如兵刑錢穀之吏不可一日無也然爲國者每每收取不忍棄去豈固爲是不急哉蓋天下之事惟此爲最難非誠好之捐三二十年之勤耗心力彫瘁齒髮飲食寢夢悲歡得喪一在於是者殆未易可以言工信工矣然且高不足以爲功名下不足以得財利塵編蠹簡束而藏之幸世有知此道者歎息稱工嗚呼可謂鈍哉以天下之至勤苦爲天下之至鈍待千萬中一二人之知此賢公卿以人物爲己任者所以不忍棄也某小人生無他

長不幸束髮有文字之愚。自上世遺文。先秦古書。晝讀夜思。開山破荒。以求聖賢。致意處。雖才識淺闇。不能如古人。迎見逆決。然譬於農夫之辨菽麥。蓋亦專且久矣。原委如是。派別如是。機杼如是。邊幅如是。自六經左氏離騷以來。歷歷分明。皆可指數。不附不絕。不誣不紊。正有出於奇舊。或以爲新。橫驚別驅。層出間見。每考觀文詞之變。見其雅正。則纓冠肅衽。如對王公大人。得其怪奇。則脫帽大叫。如魚龍之陳前鼻。盧之方勝也。間輒自笑曰。以此娛憂。舒悲忘其貧病。則可耳。持以語人。幾何其不笑且罵哉。誠不自己。諸公聞之。或以爲可。書生所遭如此。雖窮死。足以無憾矣。然師慕下風。而未得一望履舄。此心歉然。不敢違寧。恭惟明公道德風節。師表一世。當功名富貴之會。而不矜踐山林鐘鼎之異。而不變。非大有得於胸中。其何以能此。夫文章小技耳。然與至道同一關捩。惟天下有道者。乃能盡文章之妙。此某所以忘其賤且愚。而願有聞於左右也。

上虞丞相書

某聞才而見任。功而見錄。天下以爲當。君子曰。是管仲相齊。衛鞅相秦之法耳。有人於此。才不足任。功不足錄。直以窮故哀之。天下且以爲過。君子則曰。是三代之俗。周公孔子之政也。何也。彼有才。吾賴其才。因以高位處之。彼有功。吾藉其功。因以厚祿報之。上持祿與位。以御其下。下挾才與功。以望其上。非市道乎。故齊秦用之。雖足濟一時之急。而俗以大壞。君子羞稱焉。若夫三代之俗。周公孔子之政。則不然。無才也。無功也。是直無所用也。無所用之人。雖窮而死者。百千輩。何損於人之國哉。自薄者視之。尙奚恤。君子顧深哀之。視其窮。若自我推。以與之。之不敢安也。矜憐撫摩。衣之食之。曰。彼有才。有功者。何適而不遇。吾所

急者其惟無所用而窮者乎。此心父母也。推父母之心。以及於天下無所用之人。非聖賢孰能哉。謂之三代之俗。周公孔子之政。則宜。故王霸之分。常在於用心之薄厚。而昧者不知也。恭惟大丞相道學精深。力量廣大。庶幾以周公孔子之政。而復三代之俗者。渾渾巍巍。不可窺測。平時挾功恃才。錙銖較計者。皆自失退聽。若某之愚。不才無功。留落十年。乖隔萬里。而終未敢自默。特曰。身之窮。大丞相所宜哀耳。某行年四十。有八家。世山陰。以貧悴。逐祿於夔。其行也。故時交友。醜緡錢以遺之。峽中俸薄。某食指以百數。距受代不數月。行李蕭然。固不能歸。歸又無所得食。一日祿不繼。則無策矣。兒年三十。女二十。婚嫁尙未敢言也。某而不爲窮。則是天下無窮人。伏惟少賜動心。捐一官以祿之。使粗可活。甚則使可具裝以歸。又望外則使可畢一二婚嫁。不賴其才。不藉其功。直以其窮可哀而已。此氣象。自秦以來。世以功利相高。沒不見者。累二千年。今始見於門下。所願持之不搖。行之不疑。則豈獨某之幸哉。

上辛給事書

某官閣下。君子之有文也。如日月之明。金石之聲。江海之濤瀾。虎豹之炳蔚。必有是實。乃有是文。夫心之所養。發而爲言。言之所發。比而成文。人之邪正。至觀其文。則盡矣。決矣。不可復隱矣。爝火不能爲日月之明。瓦釜不能爲金石之聲。潢汙不能爲江海之濤瀾。犬羊不能爲虎豹之炳蔚。而或謂庸人能以浮文眩世。烏有此理也哉。使誠有之。則所可眩者。亦庸人耳。某聞前輩以文知人。非必鉅篇大筆。苦心致力之詞也。殘章斷藁。憤譏戲笑。所以娛憂而舒悲者。皆足知之。甚至於郵傳之題詠。親戚之書牘。軍旅官府倉卒之間。符檄書判。類皆可以洞見其人之心術才能。與夫平生窮達壽夭。前知逆決。毫芒不失。如對棊枰。而

指白黑如觀人面而見其目衡鼻縱不待思慮搜索而後得也。何其妙哉。故善觀晁錯者不必待東市之誅。然後知其刻深之殺身善觀平津侯者不必待淮南之謀。然後知其阿諛之易與。方發策決科時。其平生事業已可望而知之矣。賢者之所養動天地開金石。其胸中之妙充實洋溢。而後發見於外。氣全力餘。中正閎博。是豈可容一毫之僞於其間哉。某束髮好文。才短識近。不足以望作者之藩籬。然知文之不容僞也。故務重其身而養其氣。貧賤流落。何所不有。而自信愈篤。自守愈堅。每以其全自養。以其餘見之於文。文愈自喜。愈不合於世。夫欲以此求合於世。某則愚矣。而世遂謂某終無所合。某亦不敢謂其言爲智也。恭惟閣下以臯陶之謨。周公之誥。清廟生民之詩。啓迪人主而師表學者。雖鄉殊壤絕。百世之下。猶將想望而師尊焉。某近在屬部。而不能承下風。望餘光。則是自絕於賢人君子之域矣。雖然。非敢以文之工拙爲言也。某心之爲邪爲正。庶幾閣下一讀其文而盡得之。唐人有曰。士之致遠。先器識而後文藝。是不得爲知文者。天下豈有器識卑陋。而文詞超然者哉。狂妄冒犯。死有餘罪。

答邢司戶書

五月二十六日。笠澤陸某頓首再拜。復書司戶迪功足下。某辱賜書。及聖人之道與古作者之文章。又以世之稱師弟子。而徒事科舉。求利祿者爲羞。卓乎偉哉。非某所敢仰望萬一也。某少之日。學文而不工。及其老。妄意於道。亦未敢謂得也。身且弗給。而何以及人。及庸衆人且弗能。其況有以助足下乎。惶恐惶恐。雖然。足下顧我厚。某其敢有所弗盡。吾曹有衣食祭祀婚嫁之累。則出而求祿。恐未爲非。旣不免求祿。則從事於科舉。恐亦未爲可憾。科舉之文。固亦尊王而賤霸。推明六藝而誦說古今。雖小出入。要其歸亦何

負於道哉。若言之而弗踐。區區於口耳。而不自得於心。則非獨科舉之文爲無益也。近時頗有不利場屋者。退而組織古語。剽裂奇字。大書深刻。以眩世俗。考其實。更出科舉下遠甚。讀之使人面熱。足下謂此等果可言文章乎。尚不可欺僕輩。安能欺足下哉。故自科舉取士以來。如唐韓氏。柳氏。吾宋歐氏。王氏。蘇氏。以文章擅天下者。莫非科舉之士也。此無他。徒以在場屋時。苦心耗力。凡陳言淺說之可病者。已知厭棄。如都市之玉工。珉玉雜治。積日既久。望而識之矣。一旦取荆山之璞。以爲黃琮蒼璧萬乘之寶。珉其可復欺邪。凡今不利場屋。而名古之文者。往往多未嘗識珉者也。又安知玉哉。乃如足下識之。可謂精矣。當棄珉剖玉而已。至於聖人之道。足下往昔朝夕所講習者。豈外於是言之而必踐焉。心之而不徒口耳焉。無餘道矣。某文旣不工。聞道又甚淺。則今所以進於左右者。其果近乎。一讀置之。無重吾過不宣。

答劉主簿書

某才質愚下。又兒童之歲。遭罹多故。奔走避兵。得近文字最晚。年幾二十。始發憤欲爲古學。然方是時。無師友淵源之益。凡古人用心處。無所質問。大率以意度。或中或否。或始疑其非。終乃大信。或初甚好之。已而徐覺不可者多矣。然亦竟不知所謂是且非者卒何如也。方竊媿歎。不意如足下學術文章。足以雄長一世者。乃不鄙其愚。而欲與之交。惠然見臨。賜之以言。以爲可與言古學者。文詞偉麗。讀之惕然。夫道遇乞人。責之千金。足下固過矣。然遂謂足下爲非。則不可。往者前輩之學。積小以成大。以所有易所無。以能問於不能。故其久也。汪洋浩博。該極百家。而不可涯涘。如足下所稱諸公。蓋皆如是也。至中原喪亂。諸名勝渡江。去前輩尙未甚遠。故此風猶不墜。不幸三二十年來。士自爲畦畛甚狹。己所未知者。輒訕薄之。

以爲不足學。排抑沮折。惟恐不力。詆窮經者。則曰傳註已盡矣。詆博學者。則曰不知無害爲君子。嗚呼。陋哉。夫世旣未有仁智之足如孔孟而師焉。則亦各出所長。相與講習。從其可者。去其不可者。自六經百氏。歷代史記。與夫文詞議論。禮樂耕戰。鍾律星曆。官名地志。姓族物類之學。今四方之士。亦不可謂無人。雖不能兼該衆長。要爲各有所得。往往皆捐數十年之功。耗心疲力。彫頰齒髮而爲之。豈可易哉。如足下之所已得者。某願就學焉。其未者。頗願與足下從諸君子。歷探其所有。足下亦宜盡發所淳蓄。以與朋友共之。某所聞誠最淺薄。亦願再拜以進。惟足下與諸君子之所決擇。使前輩風俗。由吾輩復少振。而狹陋之病。不遂沉痼。豈細事哉。屬兩目苦眩。未得面陳。而先以書布謝。惶恐惶恐。

與尉論捕盜書

某昨暮聞以逐盜遽出。雖小事。亦有難處置者。此十許人皆負重辟。相與竄伏山林中。昏夜伺便小劫。比官知之。則已分散跳匿。無次舍旗鼓。可以物色求。無褊裨部伍。可以策畫破。無糧可燒。無巢穴可窮。驟集忽散。如鬼物然。又實小盜。官兵計其不能爲甚害。所以久不獲也。今未言能萬一馴至大盜。但無辜之民。時時遭劫。亦不可云細事。方其劫時。執縛恐迫。計民之冤。與遭大盜。亦有何異。今日偶見一退卒說此事。頗若可采。不敢效庸人以非職事故。默默不以告。卒言此十許人雖出沒合散不常。似難遽獲。然晝必食。夜必息。得金帛必賣。劫掠往來。至近亦須行四五里。豈有都無一人見之之理。蓋自頃民言見賊。官輒意其與賊通。捕繫笞掠。久之。無所得。始釋去。是官自塞耳目。爲賊計則多。爲捕賊計則疎矣。一二年來。民間懲創此事。雖與賊交臂而過。歸家噤默。不敢以語比鄰。而況於告官乎。故官兵動息。賊皆先知。而賊雖近。

在十步內。官兵終不得知。某思其言。實中事情。亦嘗竊度之。環三縣弓手土兵。爲人幾何。逐捕十許賊。連歲弗獲。不可不思其故也。四境無事。秋稼如雲。誰肯爲賊囊橐者。縱有。亦不應人人皆然。吾輩儒者。當有大略。願足下曠然無疑於胸中。不當效武夫俗吏。但知守故常也。夫戰而獻馘。自三代以來用之。不可謂非古。然近世至賊殺平人。以爲功。靖康建炎間。不勝其弊。始更制。凱還勿獻馘。使將校列上功。最而已。由是妄殺之禍。十去八九。然則三代聖人之遺法。尙可改以便事。而況近歲。妄庸者所爲乎。自今有言見盜者。當一切慰藉遣去。卽度其不妄。或羸有補。則又稍旌別之。雖目前未得力。但使人人敢言見賊。賊蹤跡益露。勢益窮蹙。遠不過數月獲矣。足下試熟策之。秋暑野次自愛。

答陸伯政上舍書

九月六日。某再拜復書伯政學士宗友兄閣下。卽日初寒。伏惟尊候萬福。春中蒙見顧。衰疾無聊。不得款承。絕塵邁往之論。至今悵悵。忽賢郎上舍攜所貺書及新詩來。已深開慰。又得雜著詩文一編。置百事讀之。所以開益。殆非一端。古聲不作久矣。所謂詩者。遂成小技。詩者果可謂之小技乎。學不通天人。行不能無愧於俯仰。果可以言詩乎。僕紹興末。在朝路。偶與同舍二三君。至太一宮。聞中有高士齋。皆名山高逸之士。欣然訪之。則皆扁戶出矣。裴回老松流水之間。久之。一丫髻童負琴引鶴而來。風致甚高。吾輩相與言曰。不得見高士。得見此童。亦足矣。及揖而問之。則曰。今日董御藥生日。高士皆相率往獻香矣。吾輩遂一笑而去。今世之以詩自許者。大抵多太一高士之流也。不見笑於人。幾希矣。而望其有陶淵明杜子美之餘風。果可得乎。雜文數篇。多甲寅以來所著。言論風旨。皆非同乎俗。合乎世者。與平甫書用意尤至。則

石守道李泰伯氣格相上下。而師友淵源。未可以望吾伯政也。然所以告平甫者。尙恐有所含蓄。不欲盡發。此非而莫究。昨日兒子自城中來。知方伯嘗已卒。天乎。有是哉。計老兄亦同此哀也。賢子表表超絕。當爲名士。不止取科第而已。奉爲宗家。贊喜無已。黃精奇妙。感激千萬。匆匆不旣所欲言者。亦坐老憊耳。漸寒珍重珍重。

答王樵秀才書

十一月二日。山陰陸某再拜復書。先輩足下。貢舉之法。擇進士入官者爲考試官。官以考試名。當日夜專心。致志以去取士。不可兼蒞他事。則又爲設一官。謂之監試。監試羸官不復擇。蓋夫人而可爲也。甚至法吏流外。平日不與清流齒者。亦得爲之。故又設法曰。監試毋輒與考校。則所以待監試可知矣。某鄉佐洪州。適科舉歲。當以七月到官。遂泊舟星子灣。幾月。聞已鎖院。不敢進。非獨畏監試事煩。實亦羞爲之。今年在夔府。府以四月試。試前嘗白府帥。願得移疾。已見許矣。會部使者難之。某驚弱。畏以避事得罪。遂罷勉入院。某與諸試官皆不相識。惴惴恐其以侵官犯律。令見詬。自命題至揭榜。未嘗敢一語及之。不但不與也。間偶見程文。一二可愛者。往往遭塗抹疵。詆令人氣湧如山。然歸臥室中。財能向壁歎息。蓋再三熟計。雖復強聒。彼護短者決不可回。但取詬耳。若可回。雖詬固不避也。如足下之文。又不止可愛。誠可敬且畏者。而一旦以疑黜。此豈獨足下不能無言。雖試官與拔解諸人。亦嘖嘖稱屈。某至是直欲以羸官不與考試自恕。其可乎。將因紹介再拜請罪於門牆而未敢也。不圖足下容之察之。更辱賜書。講修朋友之好。而以前者不能無言爲悔。方是時。使足下遂能無言。固大善。然士以功名自許。非得一官。則功名不可致。雖

決當黜。尙悒悒不能已。況以疑黜乎。某往在朝。見達官貴人免去。不憂沮者蓋寡。彼已貴。雖免。貴固在其所失。孰與足下多。然猶如此。今乃責足下以不少動心。亦非人情矣。前輩有錢希白。少時試開封。得第二。希白豪邁。自謂當第一。乃詣闕上書。詆主司。當時不以爲大過。希白卒爲名臣。夫科舉得失。爲重。高下細事耳。希白不能忍其細。而責足下默默於其重者。可不可邪。是皆已往事。不足復言。區區仰歎。足下才氣。思有以奉廣。故詳及之。某吳人。凡吳之陸。皆同譜。所謂四十九枝譜是也。如龍圖公雖差遠。顧尙可紀。則於足下。亦有瓜葛。蒙敦篤。尤感。且暮詣見。先此爲謝。

卷第十四

容齋燕集詩序

廉宣仲葺其燕居之室曰容齋。旣成。置酒落之。舉觴屬客曰。吾聞東郭順子之爲人。人貌而大。清而容物。吾雖不能。而竊慕焉。諸君以爲何如。或曰。方公盛壯時。以郡文學高第入爲博士。公卿盡傾。名流彥士。執贄求見者。肩摩而袂屬。車騎雍容。行者趨避。議論英發。聞者傾聽。傲色不至於目。慢言不接於耳。方是時。容物固無甚難也。及轉徙江湖。白首下吏。舍於邸者。爭席。遇於途者。相誰何。則公之容固難矣。至於罹口語。絀吏議。少年之喜謗。前輩者。闕然成市。公猶容之。則豈不甚難哉。敢問所以能此者。何也。宣仲笑曰。是亦有道焉。可容者。吾以其情容之。不可容者。吾以其人容之。故吾遇客而驩然。遇酒而醺然。遇怒罵。如風葉之過吾前。候蟲之鳴吾旁也。子欲聞其說乎。方子之飲酒也。俳諧者箕踞。角觥者裸裎。子何以不

怒豈不以其爲此者非媿耶。此吾所謂以其情容之也。世有服讒蒐慝。習於爲惡。勇於爲不義者。誠若可疾矣。吾則徐思之。曰。彼君子邪。固不至此。彼小人邪。此固小人之常。而吾以動心。則去彼亦無幾何耳。此又吾所謂以其人容之也。二者可容。何所不容。而子獨何怪於是。坐客媿且歎曰。吾儕誠小人哉。某在衆人中。尤號褊率。蓋屢歎也。酒酣。客皆賦詩。而屬某爲敍。旣不得辭。則因以識其媿。將覽觀之。以自儆焉。

京口唱和序

隆興二年閏十一月壬申。許昌韓無咎以新番陽守來省。太夫人於潤。方是時。予爲通判郡事。與無咎別。蓋逾年矣。相與道舊。故問朋遊。覽觀江山。舉酒相屬。甚樂。明年改元乾道。正月辛亥。無咎以考功郎徵。念別有日。乃益相與遊。遊之日。未嘗不更相和答。道羣居之樂。致離闊之思。念人事之無常。悼吾生之不留。又丁寧相戒。以窮達死生。毋相忘之意。其詞多宛轉深切。讀之動人。嗚呼。風俗日壞。朋友道缺。士之相與如吾二人者。亦鮮矣。凡與無咎相從者六十日。而歌詩合三十篇。然此特其略也。或至於酒酣耳熱。落筆如風雨。好事者從旁掣去。他日或流傳樂府。或見於僧窗驛壁。恍然不復省識者。蓋又不可計也。潤當淮江之衝。予老益厭事。思自放於山巔水涯。與世相忘。而無咎又方用於朝。其勢未能遽合。則今日之樂。豈不甚可貴哉。予文雖不足。與無咎竝傳。要不當以此廢而不錄也。二月庚辰。笠澤陸某務觀序。

送關漕詩序

李固杜喬。臧洪之死。士以同死爲榮。范文正之貶。士以不同貶爲恥。今著作之免歸也。御史以風聞言之。天子以無心聽之。與前事固大異。而坐客賦詩。或危之何也。風俗異也。某旣列名衆詩之次。又承命作序。

二罪當併按矣。乾道六年十二月七日笠澤陸某序。

雲安集序

濟南治歷城。漢故縣也。帶灤水而表歷山。其山川雜見於春秋。孟子史記諸書。舜之遺迹。蓋至於今可考。士生其間。多通儒名。卿秀傑之士。而以筆墨馳騖相高。往往多清麗雄放警絕之詞。與山川稱。若今夔府連帥王公是已。公自少時寓祕閣。直晚由尙書郎。長三院御史。出牧於夔。實督峽中十五郡。資忠厚。故政令簡。心樂易。故民夷親。乃因暇日。登臨矚望。徘徊太息。弔丞相之遺祠。想拾遺之高風。醉墨淋漓。放肆縱橫。實爲一代傑作。顧夔雖號大府。而荒絕瘴癘。戶口寡少。曾不敵中州一下郡。如某輩又以憂患留落。九死之餘。才盡志衰。欲強追逐。公後而不可得。向使公當承平時。爲并爲雍。爲鎮爲定。盡得四方賢士大夫。以爲賓客。相與覽其河關之勝。以騁筆力。則公衆作森列。豈特此而已哉。雖然是猶未也。必極公之文。絃歌而薦郊廟。典冊而施朝廷。然後曰宜。今乃猶嘯詠於荒山野水之濱。追前世放逐羈旅之士。而與之友。雖小夫下吏。或幸得之。於虜。是可歎歎。公以乾道七年八月移牧永嘉。行有日。奉節令右從政郎晉慈安高衷。公在郡文章若干篇。爲雲安集。且屬通判州事左承議郎山陰陸某爲序。十月二十六日序。

送范西叔序

乾道壬辰二月。予道益昌。始識范東叔。後月餘。遂與東叔兄西叔爲僚於宣威幕府。又三月。西叔以樞密使薦。趣召詣行在所。二君皆中書侍郎榮公孫也。昔榮公對制策於治平。爭詔獄於熙寧。論河事邊事。刑名赦令於元祐。雖用舍或小異。而要皆不合。故用不極其材。以沒沒。又列黨籍。其門戶爲世排詆諱惡者。

幾四十年。又四十年。而西叔兄弟始復奮發。爲蜀知名士。世之論盛衰者。謂人定勝天。天定亦勝人。予獨鄙此說。夫盛衰皆天也。人何與焉。天將禍人之國。則小人得志。而君子廢。其將福之也。則君子見用。而小人絀。國有禍福。而君子無屈伸。彼區區者。乃誠謂天與人。以衆寡疾徐爲勝負。豈不可悲也哉。九月丁丑。西叔始東下。同舍相與臨漾水。置酒賦詩。而屬予爲序。夫吾曹之望於西叔。所以繼榮公者。豈獨爵位隆赫。文辭行中朝而已哉。雖然。予與西叔。皆黨籍家也。旣以勵西叔。亦以自勵。且勵吾東叔云。

東樓集序

余少讀地志。至蜀漢巴夔。輒悵然有遊歷山川。攬觀風俗之志。私竊自怪。以爲異時。或至其地。以償素心。未可知也。歲庚寅。始泝峽。至巴中。聞竹枝之歌。後再歲。北遊山南。憑高望鄠。萬年諸山。思一醉曲江。漢陂之間。其勢無繇。往往悲歌流涕。又一歲。客成都。唐安。又東至於漢嘉。然後知昔者之感。蓋非適然也。到漢嘉。四十日。以檄得還成都。因索在筓得古律三十首。欲出則不敢。欲棄則不忍。迺敍藏之。乾道九年六月二十一日。山陰陸某務觀序。

范待制詩集序

石湖居士范公待制。敷文閣來帥成都。兼制置成都潼川利夔四道。成都地大人衆。事已十倍他鎮。而四道大抵皆帶蠻夷。且北控秦隴。所以臨制捍防。一失其宜。皆足致變。故於呼吸顧盼之間。以是幕府率窮日夜力。理文書。應期會。而故時巨公大人。亦或不得少休。及公之至也。定規模。信命令。弛利惠。農選將治兵。未數月。聲震四境。歲復大登。幕府益無事。公時從其屬。及四方之賓客。飲酒賦詩。公素以詩名。一代故

落紙墨未及燥。士女萬人已更傳誦。被之樂府絃歌。或題寫素屏團扇。更相贈遺。蓋自蜀置帥守以來。未有也。或曰。公之自桂林入蜀也。舟車鞍馬之間。有詩百餘篇。號西征小集。尤雋偉。蜀人未有見者。盡請於公。以傳。屢請而公不可。彌年乃僅得之。於是相與刻之。而屬某爲序。淳熙三年上巳日。朝奉郎成都府路安撫司參議官兼四川制置使司參議官山陰陸某序。

持老語錄序

持禪師。明州鄞人。世爲士。一旦棄髮鬚。學佛。得法於白牛卿。初住餘姚法性。數年忽謝去。越牧欲以雍熙邀致。疑不就。試一問之。師欣然曰。願卽得檄。牧大喜。師懷負包笠。卽日徒步入院。秉節如金石。說法如雷霆。雖從之遊者。不過四五十輩。而名震吳越。盡交一世名卿賢大夫。予先君會稽公。知之最深。予時甫數歲。侍先君旁。無旬月不見師。至今想其抵掌笑語。瞭然在目前。夷粹真率。真山林間人也。後又徙居雪竇。護聖二山。年德益高。如徑山杲公輩。皆以丈人行尊事之。其滅也。談笑如平時。蓋以真率爲佛事者邪。得法弟子子詢。行光如寂。廣懃。或出世說法。或遁迹衆中。皆不幸早逝去。而法揚用璋。獨在揚。於是亦住護聖。巋然爲叢林耆宿。璋老且病。猶自力刻師語錄。且合辭屬予爲序。師可謂有子矣。予以先君故。不敢辭。淳熙六年五月二十五日。山陰陸某序。

師伯渾文集序

乾道癸巳。予自成都適犍爲。識隱士師伯渾於眉山。一見。知其天下偉人。予旣行。伯渾餞予於青衣江上。酒酣浩歌。聲搖江山。水鳥皆驚起。伯渾飲至斗許。予素不善飲。亦不覺大醉。夜且半。舟始發去。至平羌酒。

解得大軸於舟中。則伯渾醉書。紙窮墨燥。如春龍奮蟄。奇鬼搏人。何其壯也。後四年。伯渾得疾不起。子懷祖集伯渾文章。移書走八千里。乞余爲序。嗚呼。伯渾自少時名震秦蜀。東被吳楚。一時高流皆尊慕之。願與交。方宣撫使臨邊。圖復中原。制置使并護梁益兵民。皆巨公大人。聞伯渾名。將聞於朝。而卒爲忌者所沮。夫伯渾既決不肯仕。卽無沮者。不過有司歲時奉粟帛牛酒勞問。極則如孔叵徐復輩。賜散人號。書其事於史而已。於伯渾何失得。而忌已如此。鄉使伯渾出而事君。爲卿爲公。則忌者當益衆。排擊沮撓。當不遺力。徒比景輸左校。殆未可知。安得如在眉山躬耕婦織。放意山水。優游以終天年邪。則伯渾不遇。未見可憾。或曰。伯渾之才氣。空海內無與比。其文章英發鉅麗。歌之清廟。刻之彝器。然後爲稱。今一不得施。願退而爲山巔水涯。娛憂紓悲之言。豈不可憾哉。予曰。是則有命。識者爲時惜。不爲伯渾歎也。淳熙某月某日。山陰陸某序。

晁伯咎詩集序

傳密居士東里晁公伯咎詩四百六十有一篇。其孫教授君百談集爲四卷以授予。請序卷首。伯咎少以文學稱。自其諸父景迂。具茨先生皆歎譽之。諸公貴人亦往往聞其名。願黨家不敢取。靖康之元。黨禁解。伯咎召爲開封掾。且顯用矣。阻兵不能造朝。比乘輿過江。中原方兵連不解。士大夫多以甲兵錢穀進。故家名流。乃見謂不切事機。伯咎落江湖者數年。久之。雖起。乘傳嶺海。復坐微文斥。卒棄不用。以死。而伯咎傲睨憂患。不少動心。方扁舟往來吳松。嘯歌飲酒。益放於詩。其名章秀句。傳之士大夫。皆以爲有承平臺閣之風。蓋晁氏自文元公以大手筆用於祥符天禧間。方吾宋極盛時。封泰山。禮百神。歌頌德業。冶金伐

石極文章翰墨之用。汪洋溟濔。五世百餘年。文獻相望。以及建炎紹興。公獨殿其後。又少時所交。皆中州名勝。講習磨礱之益深矣。是豈寔書生聞見局陋者。敢望其涯哉。伯咎學問瞻博。胸中恢疎。勇於爲義。視死生禍福無如也。至他文亦皆豪奇。不獨其詩可貴。尙力求而盡傳之。伯咎諱公邁。仕至某官。淳熙七年十一月十七日。山陰陸某序。

長短句序

雅正之樂微。乃有鄭衛之音。鄭衛雖變。然琴瑟笙磬猶在也。及變而爲燕之筑。秦之缶。胡部之琵琶。箏篌。則又鄭衛之變矣。風雅頌之後。爲騷。爲賦。爲曲。爲引。爲行。爲謠。爲歌。千餘年後。乃有倚聲製辭。起於唐之季世。則其變愈薄。可勝歎哉。予少時汨於世俗。頗有所爲。晚而悔之。然漁歌菱唱。猶不能止。今絕筆已數年。念舊作終不可捨。因書其首以識吾過。淳熙己酉。炊熟日。放翁自序。

徐大用樂府序

古樂府有東武吟。鮑明遠輩所作。皆名千載。蓋其山川氣俗。有以感發人意。故騷人墨客。得以馳騁上下。與荊州邯鄲巴東三峽之類。森然竝傳。至於今不泯也。吾友徐大用家本東武。呼吸食飲於邗淇之津。蓋有以相其軼思者。故自少時。文辭雄於東州。比南歸。以政事議論。顯聞薦紳。顧不肯輕出其文。以沽世取富貴。三十年猶屈治中別駕。澹然莫測涯涘。獨於悲懽離合。郊亭水驛。鞍馬舟楫間。時出樂府辭。瞻蔚頓挫。識者貴焉。或取其數百篇。將傳於世。大用復不可。曰。必放翁以爲可傳。則幾矣。不然。姑止。予聞而歎曰。溫飛卿作南鄉九闋。高勝不減夢得竹枝。訖今無深賞音者。予其敢自謂知君哉。獨感東武山川。旣墮胡

塵中而大用之才久伏不耀。故爲之一言。紹熙五年三月庚寅。笠澤陸某務觀序。

呂居仁集序

天下大川莫如河江。其源皆來自蠻夷荒忽遼絕之域。累數萬里而後至中國。以注於海。今禹之遺書。所謂岷積石者。特記禹治水之迹耳。非其源果止於是也。故爾雅謂河出崑崙虛。而傳記又謂河上通天漢。某至蜀窮江源。則自蜀岷山以西皆岷山也。地斷壤絕。不復可窮。河江之源。豈易知哉。古之學者。蓋亦若是。惟其上探慮義。唐虞以來。有源有委。不以遠絕。不以難止。故能卓然布之天下。後世而無媿。凡古之言者。皆莫不然。自漢以下。雖不能如三代盛時。亦庶幾焉。宋興。諸儒相望。有出漢唐之上者。迨建炎紹興間。承喪亂之餘。學術文辭。猶不愧前輩。如故紫微舍人東萊呂公者。又其傑出者也。公自少時。既承家學。心體而身履之。幾三十年。仕愈躡。學愈進。因其暇。盡交天下名士。其講習探討。磨礱浸灌。不極其源不止。故其詩文。汪洋閎肆。兼備衆體。間出新意。愈奇而愈渾厚。震耀耳目。而不失高古。一時學士宗焉。晚節稍用於時。在西掖。嘗兼直內庭。草趙丞相鼎制。力排和戎之議。忤秦丞相檜。秦公自草日曆。載公制辭。以爲罪。而天下益推公之正。公平生所爲詩。既已孤行於世。嗣孫祖平。又盡哀他文。凡若干首。爲若干卷。而屬某爲序。某自童子時。讀公詩文。願學焉。稍長。未能遠遊。而公捐館舍。晚見曾文清公文。清謂某君之詩淵源。殆自呂紫微。恨不一識面。某於是尤以爲恨。則今得託名公集之首。豈非幸歟。慶元二年九月。旣望中大夫提舉建寧府武夷山沖佑觀山陰陸某謹序。

佛照禪師語錄序

拙庵禪師以佛法際遇孝宗皇帝。問答之語。既刻金石。傳天下久矣。晚菴居阿育王山中。其徒相與盡哀。五會所說法。凡數萬言。爲五卷。遣侍者正球走山陰澤中。請某作序。某曰。拙庵之道。棟梁大法。無語可也。拙菴之語。雷霆百世。無錄可也。又何以序爲哉。然五會之外。別有一會。數萬言之外。別有一句。是可錄。是不可錄。諸人試下語。若也道得。老農贊歎有分。慶元三年九月壬子。陸某謹序。

趙祕閣文集序

漢孝武帝好文。淮南王安以高帝孫爲諸侯王。而學問文辭在漢庭諸儒甲乙中。其所著大小山。至與雅頌離騷竝。魏陳思王。唐太白長吉。則又以帝子及諸王孫。落筆妙古今。冠冕百世。河出崑崙虛。首四瀆。經天下。以入于海。彼源委固自不同。無足異也。宋興。宗室深居宮中。不與外庭接。故雖博學軼材。不得著見。然以詩文飛白書詔藏祕府者。亦不乏人。熙寧元豐間。始與羣臣竝進於朝。積數十年。而德麟伯山屬文。英妙寔見推於諸公間矣。漢王五世孫祕閣公。諱不拙。字若拙。少以進士奮主司。及流輩皆伏其工。初苦貧。無以養。乃教授諸生。以自給。其勤苦。殆有非寡人子所堪者。既得第。猶不廢也。晚入蜀爲州。遂持使者節。學益不厭。文益妙。予行南充閬中小益至成都。歷山郵津亭。及浮屠老子之廬。見穹碑巨板。多公遺文。每觀之。至忘食。已而故尙書孫公仲益。端明汪公聖錫。侍御王公龜齡。文益出於世。往往見公名字於其間。許與甚至。然後知天下自有公論也。公之子善發。善零。皆取世科。善發字正己。尤以文學稱。其爲漢州判官也。囊公之文。萬里請予於山陰澤中。曰。願有以冠篇右。顧公平生知己久已凋落。予材下。徒以後死。不得讓。媿可量哉。慶元六年三月丁巳。中大夫直華文閣致仕賜紫金魚袋山陰陸某序。

方德亨詩集序

詩豈易言哉。才得之天。而氣者我之所自養。有才矣。氣不足以御之。淫於富貴。移於貧賤。得不償失。榮不蓋媿。詩由此出。而欲追古人之逸駕。詎可得哉。予自少聞莆陽有士曰方德亨。名豐之才甚高。而養氣不撓。呂舍人居仁。何著作摛之。皆屈行輩與之遊。德亨晚愈不遭。而氣愈全。觀其詩。可知其所養也。既歿者。千年待制朱公元晦。以書及德亨之詩示予於山陰。曰。子爲我作德亨集序。往時有方昀者。與德亨同族。爲予言。德亨遇疾。卒於臨安。逆旅垂困。猶能起坐。正衣冠。手自作書。與其族人官臨安者。使買棺。棺至。乃歿。色辭不異平日。非養氣之全能如是乎。請以是爲序。慶元六年四月丁酉。山陰陸某序。

會稽志序

昔在夏禹。會諸侯於會稽。歷三千歲。而我高宗皇帝御龍舟。橫濤江。應天順動。復禹之跡。駐蹕彌年。定中興之業。羣盜削平。強虜退遁。於是用唐幸梁州故事。陞州爲府。冠以紀元。大駕旣西。幸而府遂爲股肱。近藩稱東諸侯之首。地望蓋視長安之陝洛。汴都之陳許。所命牧守。皆領浙東安撫使。其自丞相執政來。與去而拜丞相執政者。不可遽數。而又昭慈聖烈皇后及永祐以來。四陵攢殿。相望於鬱葱佳氣中。朝謁之使。艦衝穀擊。中原未清。今天下鉅鎮。惟金陵與會稽耳。荆揚梁益潭廣皆莫敢望也。則山川圖諜。宜其廣載。備書顧未暇及者。縣數十年。大卿沈公作賓。待制趙公不迹繼爲守。皆慨然以爲己任。乃與通判軍事施君宿。安撫司幹辦公事李君兼韓君茂卿。及郡士馮景中邵持正陸子虞王度朱熊等。上參禹貢。下考太史公及歷代史金匱石室之藏。旁及爾雅本草道釋之書。裨官野史所傳。神林鬼區幽怪恍惚之說。秦

漢晉唐以降金石刻歌詩賦詠殘章斷簡靡有遺者若父老以口相傳不見於文字者亦間見層出積勞累月乃成是雖本之圖經圖經出於先朝非藩郡所可附益乃用長安河南成都相臺之比名會稽志會稽爲郡雖遷徙靡常而郡本以山得名又禹所巡也故卒以名之而屬某爲之序嘉泰元年二月庚子中大夫直華文閣致仕陸某謹序

卷第十五

施司諫註東坡詩序

古詩唐虞賡歌夏述禹戒作歌商周之詩皆以列於經故有訓釋漢以後詩見於蕭統文選者及高帝項羽章孟楊惲梁鴻趙壹之流歌詩見於史者亦皆有註唐詩人最盛名家者以百數惟杜詩註者數家然槩不爲識者所取近世有蜀人任淵嘗註宋子京黃魯直陳無己三家詩頗稱詳贍若東坡先生之詩則援據閎博指趣深遠淵獨不敢爲之說某頃與范公至能會於蜀因相與論東坡詩慨然謂予足下當作一書發明東坡之意以遺學者某謝不能他日又言之因舉二三事以質之曰五畝漸成終老計九重新掃舊巢痕遙知叔孫子已致魯諸生當若爲解至能曰東坡竄黃州自度不復收用故曰新掃舊巢痕建中初復召元祐諸人故曰已致魯諸生恐不過如此耳某曰此某之所以不敢承命也昔祖宗以三館養士儲將相材及官制行罷三館而東坡蓋嘗直史館然自謫爲散官削去史館之職久矣至是史館亦廢故云新掃舊巢痕其用字之嚴如此而鳳巢西隔九重門則又李義山詩也建中初韓曾二相得政盡收

用元祐人其不召者亦補大藩。惟東坡兄弟猶領宮祠。此句蓋寓所謂不能致者二人。意深語緩。尤未易窺測。至如車中有布乎。指當時用事者。則猶近而易見。白首沉下吏。綠衣有公言。乃以侍妾朝雲嘗歎黃師是仕不進。故此句之意。戲言其上僭。則非得於故老。殆不可知。必皆能知此。然後無憾。至能亦太息曰。如此誠難矣。後二十五年。某告老居山陰澤中。吳興施宿武子出其先人司諫公所註數十大編。屬某作序。司諫公以絕識博學名天下。且用工深。歷歲久。又助之以顧君景蕃之該洽。則於東坡之意。蓋幾可以無憾矣。某雖不能如至能所託。而得序斯文。豈非幸哉。嘉泰二年正月五日。山陰老民陸某序。

達觀堂詩序

朝請郎致仕吳公景先少嘗從洛川先生朱公希真問道。朱公爲名所居堂曰達觀。手書以遺之。且賦詩一章。屬之曰。子爲人深靜簡遠。不富貴。必壽考。故吾以此事相期。景先出仕五十年。不求速化。不治生產。位僅至二千石。晚爲東諸侯客。遂引年以歸。距八十不遠。望其容貌。不腴不瘠。視聽步趨。如五六十人。非得朱公密傳親付。殆不能爾。朱公之逝甚異。世以爲與尹先覺譙天授蘇養直俱解化。僊去。則吾景先亦其流亞歟。自朱公賦詩後。士大夫繼作凡若干篇。屬予爲序。嘉泰二年十一月癸丑。放翁陸某務觀序。

梅聖俞別集序

宛陵先生遺詩及文若干首。實某官李兼孟達所編輯也。先生當吾宋太平最盛時。官京洛。同時多偉人巨公。而歐陽公之文。蔡君謨之書。與先生之詩。三者鼎立。各自名家。文如尹師魯。書如蘇子美。詩如石曼卿輩。豈不足垂世哉。要非三家之比。此萬世公論也。先生天資卓偉。其於詩。非待學而工。然學亦無出其

右者方落筆時置字如大禹之鑄鼎。練句如后夔之作樂。成篇如周公之致太平。使後之能者欲學而不得。欲贊而不能。況可得而譏評去取哉。歐陽公平生常自以爲不能望先生。推爲詩老。王荊公自謂虎鬪詩不及先生。包鼎畫虎之作。又賦哭先生詩。推仰尤至。晚集古句。獨多取焉。蘇翰林多不可古人。惟次韻和陶淵明及先生二家詩而已。雖然使本無此三公。先生何歉。有此三公。亦何以加秋毫於先生。予所以論載之者。要以見前輩識精論公。與後世妄人異耳。會李君來請予序。故書以予之。嘉泰三年正月己卯。山陰陸某序。

楊夢錫集句杜詩序

文章要法在得古作者之意。意既深遠。非用力精到。則不能造也。前輩於左氏傳太史公書韓文杜詩。皆熟讀暗誦。雖支枕據鞍間。與對卷無異。久之乃能超然自得。今後生用力有限。掩卷而起。已十亡三四。而望有得於古人。亦難矣。楚人楊夢錫才高而深於詩。尤積勤杜詩。平日涵養不離胸中。故其句法森然可喜。因以暇戲集杜句。夢錫之意。非爲集句設也。本以成其詩耳。不然。火龍黼黻手。豈補綴百家衣者邪。予故爲表出之。以告未深知夢錫者。嘉泰三年正月丁亥。笠澤陸某序。

陸伯政山堂類稿序

古之學者。始於家塾鄉校。而貢於天子之辟雍。始於抱關擊柝。而至於公卿。始於賦物銘器。師旅會盟之辭。而至於陳謨作誥。其所遇雖不同。然於明聖人之道。闡性命精微之理。則一也。周衰。道術裂於百士。士各以所見著書授徒。於是稽之堯舜禹文王周公孔子之遺書。始有大不合者。今六經散缺不全。而諸子

之書。則往往具在。又其辭怪偉辯麗。足以動蕩世之耳目。乃欲學者之文辭一合於道。而不悖戾於經。可謂難矣。吾宗伯政諱煥之。唐丞相文公希聲之。九世孫文公上距丞相元方五世。中間子孫遇五季之亂。獨不失譜。至今世次皆可序述。伯政家世爲儒。力學篤行。至老不少衰。所爲文皆本六經。無一毫汨於釋老。雖其徒有從之求文者。伯政尊所聞。猶毅然不爲之。至如楊公時。近世名儒。獨以立論少入釋老。伯政正色斥之。不遺餘力。使死而有知。吾伯政有以見周公孔子矣。其孤集遺文爲二十卷。來請余爲序。伯政之文。可稱述者衆。余獨言其學術文辭之正以序之。尙不失斯人之本意。又進其子孫云。嘉泰四年二月丁巳。笠澤陸某謹序。

普燈錄序

粵自曠大劫來。至神應迹。開示天人。未有不以文字語言相授者。今七佛偈。是其一也。至於中夏。則三萬萬年前。包犧氏作。已畫八卦造書契矣。釋迦之興。固亦無異。今一大藏教。可謂富矣。乃獨於最後舉華。示其上足弟子迦葉。迦葉欣然一笑。不立文字。不形言語。謂之正法眼藏。師舉華而傳。弟子一笑而受。旣書之木葉。旁行之間矣。亦未見其與古聖異也。豈謂之文而非文。謂之言而非言邪。昔有景德傳燈三十卷者。蓋非文之文。非言之言也。此門一開。繼者相望。其尤傑立者。續燈廣燈二書也。然皆草創簡略。自爲區別。雖聖君賢臣之事。有不能具載者。獨旁見間出於諸祖章中。識者以爲恨。吳僧正受始著普燈。凡十有七年。成三十卷。前日之恨。毫髮無遺矣。而尤爲光明崇顯者。我祖宗之明詔睿藻。哀集周悉。一一皆有據依。足以傳示萬世。寶爲大訓。其有功於釋門最大。方且上之御府。副在名山。而又以其副示某。俾得紀

述梗槩於後。某自隆興距嘉泰五備史官。今雖告老。待盡山澤。猶於祖宗遺事。思以塵露之微。仰足山海。不自知其力之不逮也。嘉泰四年三月乙酉。太中大夫充寶謨閣待制致仕山陰縣開國子食邑五百戶。賜紫金魚袋陸某謹序。

澹齋居士詩序

詩首國風。無非變者。雖周公之幽亦變也。蓋人之情。悲憤積於中而無言。始發爲詩。不然。無詩矣。蘇武李陵陶潛謝靈運杜甫李白。激於不能自己。故其詩爲百代法。國朝林逋魏野以布衣死。梅堯臣石延年棄不用。蘇舜欽黃庭堅以廢絀死。近時江西名家者。例以黨籍禁錮。乃有才名。蓋詩之興本如是。紹興間。秦丞相檜用事。動以語言罪士大夫。士氣抑而不伸。大抵竊寓於詩。亦多不免。若澹齋居士陳公德。召者。故與秦公有學校舊。自揣必不合。因不復與相聞。退以文章自娛。詩尤中律呂。不怨不怒。而憤世疾邪之氣。凜然不少回撓。其不坐此得禍。亦僅脫爾。及秦氏廢。始稍起。爲吏部郎。爲國子司業。祕書少監。遽沒於官。後四十餘年。有子知津。爲高安守。最其詩得三卷。屬某爲序。某少識公於山陰。方公召還。嘗以詩贈別。及公爲郎時。故相湯岐公一日語公曰。陸務觀別君詩。方傳世。非公之賢。何以發其語如此。時紹興己卯歲也。因高安之請。重以感歎。某於是年八十有一矣。開禧元年九月。太中大夫寶謨閣待制致仕山陰縣開國子食邑五百戶。賜紫金魚袋陸某序。

傅給事外制集序

國家自崇寧來。大臣專權。政事號令。不合天下心。卒以致亂。然積治已久。文風不衰。故人材彬彬。進士高

第及以文辭進於朝者亦多稱得人。祖宗之澤猶在，黨籍諸家爲時論所貶者，其文又自爲一體，精深雅健，追還唐元和之盛。及高皇帝中興，雖披荆棘，立朝廷，中朝人物悉會於行在。雖中原未平，而詔令有承平風，識者知社稷方永，太平未艾也。故給事中傅公以是時典西省文書，得名尤盛。公天資忠義絕人，自東夷寇逆滔天，建炎中大駕南渡，虜吞噬不遺力，幾犯屬車之塵。公眇然書生，位未通顯，獨涕泗感激，請提孤軍，橫遏虜衝，衛乘輿，論功埒諸大將，及駐驛會稽，公遂爲浙東帥，始隱然有大臣望。雖擯斥不容，而士論愈歸。及在東省，御史力詆去之，然猶知公爲一代大儒。蓋公論不可揜如此。公遺文百餘卷，嗣孫稱貧甚，手自鈔錄，以傳後世，未能竟。乃先緝外制數百篇，屬某爲序。公之文固天下所願見，而取法某未成。童時公過先少師，每獲出拜侍立，被公教誨，詎今七十餘年，幸猶後死，得論序公文，亦幸矣。某聞文以氣爲主，出處無媿，氣乃不撓。韓柳之不敵，世所知也。公自政和訖紹興，閱世變多矣。白首一節，不少屈於權貴，不附時論，以苟登用。每言虜言畔臣，必憤然扼腕裂眦，有不與俱生之意。士大夫稍有退縮者，輒正色責之，若讐。一時士氣爲之振起。今觀其制告之詞，可槩見也。公諱崧卿，字子駿，於虜賢哉。開禧元年九月某日，太中大夫充寶謨閣待制致仕山陰縣開國子食邑五百戶，賜紫金魚袋陸某謹序。

開鑿錄序

元豐初，置武學，先太師以三館兼判學事，今學制規模多出於公，而策問亦具載家集中。後百餘年，某從子朴作開鑿錄若干篇，論孫吳遺意，欲上之朝，且乞序於某某儒且老，非能知武事者。朴許國自奮之志，亦某所愧也。乃從其請，開禧元年十一月丁卯，陸某序。

周益公文集序

天之降才固已不同。而文人之才尤異。將使之發冊作命。陳謨奉議。則必畀之以閎富淹貫。溫厚爾雅之才。而處之以帷幄密勿之地。故其位與才常相稱。然後其文足以紀非常之事。明難喻之指。藻飾治具。風動天下。書黃麻之詔。鏤白玉之牒。藏之金匱石室。可謂盛矣。若夫將使之闡道德之原。發天地之祕。放而及於鳥獸蟲魚草木之情。則畀之才亦必雄渾卓犖。窮幽極微。又畀以遠遊窮處。排擯斥疎。使之磨礱齷齪。瀕於寒餓。以大發其藏。故其所賦之才。與所居之地。亦若造物有意於其間者。雖不用於時。而自足以傳後世。此二者。造物豈真有意哉。亦理之自然。古今一揆也。大丞相太師益公。自少壯時。以進士博學宏詞。疊二科起家。不數年。歷太學三館。予實定交於是時。時固多豪雋不羣之士。然落筆立論。傾動一座。無敢嬰其鋒者。惟公一人。中雖暫斥。而玉煙劍氣三秀之芝。非窮山腐壤所能湮沒。復出於時。極文章禮樂之用。絕世獨立。遂登相輔。雖去視草之地。而大詔令典冊。孝宗皇帝猶特以屬公。於虛聖主之心。亦如造物。非私公以富貴。蓋大官重任。不極不久。則無以盡公之才也。公既薨。逾年。公之子綸。以公遺文號省齋文稿者。屬予爲之序。公在位久。崇論宏議。豐功偉績。見於朝廷。傳之夷狄者。何可勝數。予獨論其文者。墓有碑。史有傳。非集序所當及也。開禧元年十二月甲子。太中大夫寶謨閣待制致仕山陰縣開國子食邑五百戶。賜紫金魚袋陸某謹序。

宣城李虞部詩序

宣之爲郡。自晉唐至本朝。地望常重。來爲守者。不知幾人。而風流吟詠。謝宣城實爲之冠。生其鄉者。幾人。

而歌詩復古。梅宛陵獨擅其宗。此兩公蓋與敬亭之山俱不磨矣。故宣之士多工於文。而五七字爲尤工。唐有李推官。以詩名當代。其家傳遺詩得數百篇。以詩考之。蓋與皮陸同時歟。自推官後。世世得能詩聲。當元豐間。有虞部公作詩益工。推官清新警邁。極鍛鍊之妙。而虞部則規模思致宏放簡遠。自宛陵出。如劉子駿文學。不盡與父同議者。亦不能優劣之也。予得其兩世遺編於虞部之曾孫臨海太守兼字孟達。孟達固詩人。蓋淵源二祖。而能不媿者。推官虞部之家世諱字。與其學術行治。蓋各見於其墓刻家牒。予獨志其詩云。開禧三年六月丙午。太中大夫寶謨閣待制致仕渭南縣開國伯食邑八百戶賜紫金魚袋陸某謹序。

曾裘父詩集序

古之說詩曰言志。夫得志而形於言。如臯陶周公召公吉甫。固所謂志也。若遭變遇譏。流離困悴。自道其不得志。是亦志也。然感激悲傷。憂時閔己。託情寓物。使人讀之。至於太息流涕。固難矣。至於安時處順。超然事外。不矜不挫。不誣不懟。發爲文辭。沖澹簡遠。讀之者遺聲利。冥得喪。如見東郭順子。悠然意消。豈不又難哉。如吾臨川曾裘父之詩。其殆庶幾於是乎。予紹興己卯庚辰間。始識裘父於行在所。自是數見其詩。所養愈深。而詩亦加工。比予來官臨川。則裘父已沒。欲求其遺書。而予蒙恩召歸。至今以爲恨。友人趙去華彥榘寄裘父艇齋小集來。曰。願序以數十語。然裘父得意可傳之作。蓋不止此。遺珠棄璧。識者與歎。去華爲郡博士。尙能博訪之。稍增編帙。計無甚難者。敢以爲請。裘父諱季狸。及與建炎過江。諸賢游。尤見賞於東湖徐公。嘉定元年二月丁酉。山陰陸某序。

送巖電道人入蜀序

王衍一生酣豢富貴。乃以口不言錢自高。巖電本張氏子。施藥說相。不受人一錢。乃自稱姓錢。以滑稽玩世。古今相反。有如此者。忽來告放翁。言將西入蜀。乃書以遺之。他日到青城。大峨眉霧中。鶴鳴諸名山。見孫思邈。朱桃椎。張四郎。余朱先生。姚小太尉。譙天授尹先覺輩。有問放翁安否者。可出此卷。相與一笑。

邢芻甫字序

衛詩美武公之德一章曰。瞻彼淇澳。綠竹猗猗。終之曰。有匪君子。終不可諼兮。淇大川也。見淇而思武公。可也。王芻芻竹草之微者。亦見而思焉。則思之至矣。此所謂終不可諼兮者歟。吾友邢子名淇。請字於予。予復之曰。士之仕者。能使一國一邑之人安其政而無怨疾嘲譏。亦已難矣。况見其鄉閭而咨嗟追慕。豈不甚難哉。今衛人於武公。見其地而思之。見其草木而思之。見其草之微者。如王芻芻竹而思之。況遇其子孫。又將何如哉。人不我忘。於我何加。然使人不怨疾嘲譏。又咨嗟追慕。久而不忘。必有以得之矣。故爲士者。於此不可不知勉也。請字子曰芻甫。芻甫勉之。仕而使一國一邑之人不忘。相處而使鄉閭黨友不忘。相與記其行事以爲法。傳其言論風指。誦習而勉於善。豈不美哉。嘉定元年四月己未。山陰陸某序。

曾溫伯字序

堯舜去今遠矣。其言傳於今者蓋寡。惟直而溫與寬而栗之言再見焉。方是時。教化之所覃。人才之所慕。全德如夔臯陶所言。是豈戒其不足哉。至商周之間。始有得聖人之清。聖人之和者。清近直。和近溫。則既分而爲二矣。若漢汲長孺事君無隱。天下爲之直。然去古之全德。又益以遠。贛川曾君黯。方其入家塾也。

大父大卿公用蘇子由張芸叟字其子孫例。字之曰溫伯。蓋以古全德訓之。有其義而亡其說。溫伯請於予曰。願有以補之。以終大父之意。予慨然歎曰。自大卿至溫伯。三世傳嫡德。亦克肖。其有以承此訓矣。序其敢辭。嘉定元年五月辛酉。山陰陸某序。

天童無用禪師語錄序

慮義一畫。發天地之祕。迦葉一笑。盡先佛之傳。浮名一默。曾點一唯。丁一牛刀。扁一車輪。臨濟一喝。德山一棒。妙喜一竹篋子。皆同此關捩。但恨欠人承當。天童無用禪師。蓋卓爾能承當者。未見妙喜大事已畢。豈有住山示衆之語。可累編簡哉。放翁謂若不投之水火。無有是處。惟韓退之所云。火其書。其語差似痛快。又恐退之亦止是說得耳。五百年後。此話大行。方知無用與放翁却是同參。嘉定元年秋九月丙辰序。

陳長翁文集序

漢之文章。猶有六經餘味。及建武中興。禮樂法度。粲然如西京時。惟文章頓衰。自班孟堅已不能望太史公之淳深。崔蔡晚出。遂墮卑弱。識者累歎而已。我宋更靖康禍變之後。高皇帝受命中興。雖艱難顛沛。文章獨不少衰。得志者司詔令。垂金石。流落不偶者。娛憂紆憤。發爲詩騷。視中原盛時。皆略可無媿。可謂盛矣。久而寢微。或以纖巧摘裂爲文。或以卑陋俚俗爲詩。後生或爲之變。而不自知。方是時。能居今行古。卓然傑立於頽波之外。如吾長翁者。豈易得哉。其子師文來乞予爲長翁集序。乃寓吾歎以慰其子。且以慰長翁於地下云。長翁高郵陳氏諱造。字唐卿。嘉定二年三月丁巳。渭南伯陸某務觀序。

卷第十六

成都府江瀆廟碑淳熙四年五月一日

自古水土之功莫先乎禹紀其事莫備乎禹貢之篇禹貢之所載莫詳乎江漢曰蟠冢導漾東流爲漢又曰岷山導江某嘗登蟠冢之山有泉涓涓出兩山間是爲漢水之源事與經合及西遊岷山欲窮江源而不可得蓋自蜀境之西大山廣谷豁舒起伏西南走蠻夷中皆岷山也則江所從來尤荒遠難知而漢過三澁至大別之麓亦卒附江以達於海故江爲四瀆之首三代典祀秩視諸侯而楚大國亦以爲望有事必禱祠焉可謂盛哉成都自唐有江瀆廟其南臨江唐末節度使高駢大城成都廟與江始隔歷五代之亂淫昏割裂神弗受職廟亦弗治宋興乾德三年平蜀越八年當開寶六年有詔自京師繪圖遣工侈大廟制傑閣廣殿脩廊邃宇聞於天下慶曆七年故太師忠烈潞公以樞密直學士來作牧則又築大堂竝廟東南以爲徹祭飲福之所而廟益宏麗矣厥後雖屢繕治有司不力寢以大壞上漏旁穿風雨入屋支傾苴罅苟偷歲月淳熙二年六月今尹敷文閣待制范公之始至也躬執牲幣祇肅祀事既退讀開寶中修廟碑惕然改容曰此太祖皇帝之詔敢弗虔南出登堂見忠烈公之識則又歎曰潞國予自出也敢弗嗣始有葺廟意矣會歲旱公潔齋以禱曰三日而雨且大治祠宇以報如期高下洽足歲以大穰公饒私餘蠻夷順服乃自三年某月庀工訖四年五月廟成總其費木以章計者八千一百二十有八竹以箇計者四萬九千四百七十甃甃釘以枚計者十八萬七千七百二十有四丹青黝堊以斤計者一萬八十有七梓匠役徒以口計者二萬三千八百爲屋二百有九間牆六千八百七十尺廟之制度復還開寶慶曆

之盛而有加焉。於是府之屬吏來請其刻文麗牲之石。且繫以詩。詩曰。開絡之躔。下應岷山。蟠踞華夷。江出其間。奔蹴三峽。放於荆揚。我考禹跡。九州茫茫。千礎之宮。肇自開寶。吏靡嚴恭。庭有蒹草。范公來止。事神是力。廟未克成。當食太息。江流東傾。於海朝宗。廟成公歸。與江俱東。壯哉湯湯。環我蜀城。萬古不竭。亦配公名。

行在寧壽觀碑

紹興二十年十月。詔賜行在三茆堂名曰寧壽觀。因東都三茆寧壽院之舊也。初。章聖皇帝。建會靈觀。實爲崇奉之始。至是高宗皇帝。方躋天下於仁壽之域。尤垂意焉。迺命道士蔡君大象。知觀事。蒙君守亮副之。許其徒世守。又命中貴人劉君敖。典領置吏胥。給清衛兵。略用大中祥符故事。後十年。敖遂請棄官。專奉寧壽香火。詔如所請。賜名能真。改左右街都道錄。仍領觀事。實又用至道中內侍洪正一故事。上心眷顧。每示優假如此。然迨今歲月。寢久未有紀之金石。以侈上賜者。紹熙五年六月。知觀事。冲素大師邵君道俊。始轉石來。請某爲文。傳示後世。某實紹興朝士。屢得對行殿。同時廷臣。零落殆盡。某適後死。獲以草野之文。登載盛事。顧不幸歟。伏觀寧壽觀。實居七寶山之麓。表裏湖江。拱輔宮闕。前帶馳道。後枕崇阜。盡得都邑之勝。廣殿中峙。脩廊外翼。雲章寶室。籤帙富麗。浩浩乎道山蓬萊之藏也。鐘經二樓。輦飛霄漢。飄乎化人中天之居也。金符象簡。羽流畢集。進趨有容。肅恭齋法。濟濟乎茹靈芝。飲沆瀣之衆也。導以霓旌。節以玉磬。侍者翼從。以登講席。琅琅乎徹九天震十方之音也。祐陵之御畫。德壽重華之宸翰。煥乎河雒之圖書也。鴻鐘大鼎。華蓋寶劍。褚遂良吳道子之遺跡。卓乎祕府之怪珍也。榮光異氣。夜燭天半。所以

扶衛社稷安鎮夷夏者。於是乎在。非他宮館壇宇可得而比。永惟我高宗皇帝。實與三茆君。自渾沌溟滓開闢之初。亦明龍漢浩劫之前。俱以願力。應世濟民。雖時有古今。迹有顯晦。其受命上帝。以福天下。則合若符券。及夫風御上賓。威神在天。與三十六帝翱翔太虛。三茆君亦與焉。時臨熙壇。顧享明薦。用敷佑於我聖子神孫。降福發祥。時萬時億。於虜休哉。某既述觀之所繇興。且繫之以銘曰。

炎祚中否。開真人。以大誓願濟下民。左右虛皇友三真。坐令化國風俗淳。乃營斯宮示宿因。丹碧岌業天與鄰。神君龍虎呵重闔。鯨鐘橫撞震無垠。錦旛寶蓋高嶙峋。天華龍燭晝夜陳。歷載九九符堯仁。超然脫屣侍帝晨。遺澤滲漉萬寓均。歲豐兵偃無吟呻。咨爾衆士嚴冠巾。以道之真治子身。服膺聖訓常如新。沖霄往從龍車塵。

嚴州烏龍廣濟廟碑

山川之祀自虞書以來。見於載籍。與天地宗廟竝。或謂山川興雲雨。澤枯槁。宜在秩祀。非必有神主之。以予考之。殆不然。維嶽降神。生甫及申。山川之神。降而爲人。與人死而爲山川之神。一也。豈幸而見於經。則可信。後世則舉不可信邪。柳宗元死爲羅池之神。其傳甚怪。而韓文公實之。張路斯自人爲龍。廟於潁上。其傳尤怪。而蘇文忠公實之。蓋二神者。所傳雖不可知。而水旱之禱。卓乎偉哉。不可泯沒。則二公亦不得而揜也。予適蜀。見李冰張惡子廟於離堆梓潼之山。皆血食千載。非獨世未有疑者。蓋其靈響暴著。亦不容置疑者矣。嚴州烏龍山廣濟廟之神。曰忠顯仁安靈應昭惠王。舊碑以爲唐貞觀中人。姓邵氏。所記甚詳。雖幽顯殊隔。不可盡質。然神靈動人如羅池。變化不測如潁上。歷數百年未嘗少替。而朝廷之所褒

顯吏民之所奉事。亦猶一日。此烏可以幸得哉。至於紹興辛巳。東海之師。羣胡見巨人皆長丈餘。弋戟麾旄。出沒煙雲間。則相告曰。烏龍神兵至矣。或降。或遁去。無敢枝梧者。是又與東晉八公山。及慶歷嘉嶺神之事相埒。然彼皆在近境。而此獨見於山海阻絕數千里之外。豈不尤異也哉。不得韓蘇之文。以侈大其傳。而邦人進士沈奐。顧以屬筆於某。辭卑事偉。有足恨者。迺作送迎神詩一章。使併刻之。實慶元五年十月甲子也。其辭曰。

王之生兮。值唐初基。龍翔於天兮。英雄是資。獨沉草萊兮。默不得施。巉然萬仞兮。胸中之奇。使得小試兮。冒白刃而搴朱旗。丈夫戰死兮。固亦其宜。死於不遭兮。精神曷歸。王亦何懟兮。人則爲悲。烏龍之山兮。跨空巍巍。築傑屋兮。奉祠。釀桂兮。羞芝。彈箜篌兮。吹參差。王捨斯民兮。逝何之。錫以祉兮。燕及悻。瘳歲屢豐兮。長無凶饑。擁羽蓋兮。駕玉螭。時節來饗兮。民之依。國有征誅兮。克相王師。長戈大纛兮。肅肅陰威。掃平河雒兮。前功弗墮。隆名顯爵兮。永世有辭。

德勳廟碑

自古王者。經綸草昧。裁定亂略。必有熊羆之士。不貳心之臣。內任心膂之寄。外宣股肱之力。而廟謨國論。密賴以決。實兼將相之任者。在我高宗皇帝時。有若太師循忠烈王張公。實維其人。粵自高宗。歷試於外。開大元帥府。總天下兵。首以山西豪傑。入侍帷幄。龍飛順動。避狄南渡。公則有扶天夾日之功。蕭牆釁起。羣公暗拱。公則倡勤王復辟之大策。氛祲內侵。戎馬豕突。公則奮却敵禦侮之奇略。巨盜乘間。羣兇和附。公則建剪除安輯之成績。由是不數年間。國勢安強。夷虜奪氣。請和而一二重將。未還宿衛。論者咸以爲

非長久計。公則率先請罷宣撫使事。奉朝請。車再上。引義懇款。於是議始定。士大夫咸謂其得大體。而高宗亦每謂之腹心舊將。又曰。從來待卿如家人。又曰。是人與他功臣相去萬萬。蓋高宗蹈履艱危。身濟大業。沉機獨智。燭微察遠。以爲方海內橫流。巡幸四方。暴衣露蓋。周衛單寡。非如中都高拱。蠅蝻變渡之居。江流阻艱。海道阨危。非如平時安行清蹕。馳道之中。不有如公者。協心同德。均禍福。共安危。譬之一家。父兄有急。子弟不召而自至。譬之一身。頭目有患。手足不令而自力。則天下之計。將以誰諉。袁盎謂絳侯功臣非社稷臣。則社稷臣與功臣果異。建炎以來。功臣則有矣。至可名社稷臣者。非公而誰。故國家所以褒表崇異。常出等夷之上。非私恩也。及配享高宗廟庭。其次偶居其後。或者疑焉。是不然。唐名將前曰英衛。後曰李郭。衛公汾陽之勳德。巍如泰山。終不以姓名次序爲歎。欽宗皇帝下詔褒顯故老。而范文正實次司馬文正之下。司馬公之賢。不過與范公等。范公輔政先數十年。聲詩所載。以配夔臯。而顧乃居次。世豈以此爲有抑揚之意哉。公之曾孫鋹。三世傳嫡長。始築廟於居第之東。廟成。以高宗御書德勳二大字爲廟之名。自忠烈以下爲三室。忠烈之配曰秦國夫人魏氏。漢國夫人章氏。第二室曰少傅公諱子厚。配曰漢國夫人蕭氏。第三室曰少師公諱宗元。配曰楚國夫人劉氏。維忠烈王勳業之詳。與夫世諱字系官爵。葬有碑。諡有誥。史有傳。此不復載。顧廟祭宜有歌詩。刻於麗牲之碑。乃作詩曰。

宋傳九聖。高宗是承。化龍渡江。天開中興。維忠烈王。翼從帝旁。捐身棄孥。獨當豺狼。煙塵未息。變生肘腋。首倡義師。氣沮金石。大業復隆。退不矜功。雪涕引罪。身衛行宮。國有大難。我則出捍。功成愈謙。將士畏歎。旣空盜藪。屢虜淮右。柘臯之捷。梁楚無寇。河維將平。虜畏乞盟。亟上虎符。就第王城。茂勳明德。爛然史冊。

燕及家國。匪王孰克。築廟作主。三室同宇。歲時奉享。豐豆碩俎。國有世臣。家有元孫。咨爾後人。祇栗廟門。秦州報恩光孝禪寺最吉祥殿碑

天下無不可舉之事。亦無不可成之功。始以果。終以不倦。此事之所以舉。而功之所以成也。海陵通川之間。自建炎後。爲盜區戰場。中雖息兵。然猶鬼嘯狐嘯於藜莠瓦礫中。自官寺民廬。皆略具爾。未幾復有紹興辛巳虜禍。前日之略具者。又踐蹂燔燒。滌地而盡。乾道淳熙以來。中外無事。函養滋息。且以國力興葺之。迨今四十年。而城郭邑屋。尙未能復承平之舊。至於浮圖之廬。又非郡縣所急。或盛或衰。皆在仕者所不問。則其舉事若尤難者。嗚呼。是特不遇浮圖之傑耳。信有之。未見其果難也。秦州報恩光孝禪寺是已。寺始爲天寧萬壽寺。今名蓋用紹興詔書改賜。亦火於辛巳之變。有祖彥師者。復葺之。未成而化。中間屢易主者。至紹熙中。今長老德範師。應轉運陳公。損之之請。而至寺。雖蠶建。而大役多未之舉。有巨鐘千石。方寺壞於兵時。樓焚。鐘墮。扁而不壞。範始至。奮曰。鐘不壞。寺將興之符也。吾舉事。將自鐘始。乃建樓百尺。以棲鐘。鐘始鑄。歲在乙卯。至是三乙卯矣。而樓成人咸異之。遂議佛殿。殿之役最大。度費錢數千萬。見者縮頸曰。使可爲。豈至今日邪。範曰。不然。吾當與有緣者力成之。不敢以難故止。已而有居士劉洪首施錢五百萬。施者不勸而集。積爲四千萬。有奇。乃伐木於黃岡。蔽流而下。方役之興。以關征爲懼。常平使者王公寧聞之。曰。斯殿以資永祐陵在天之福。孰敢議者。吾當任其事。於是所至皆爲弛禁。殿以崇成。爲重屋八楹。東西百三十六尺。南北九十六尺。高百一十尺。佛菩薩阿羅漢三十有一軀。會王公去。而後使者韓公榘取華嚴經語。書殿之顏。曰。最吉祥殿。範又爲閣六楹。以奉今天子。昔在潛邸。賜前住持覺深碧雲二

大字閣之廣袤雄麗亦略與殿稱。餘若方丈寢堂、廚庫、水陸堂、兩廡，累數十年不能成者，皆不淹歲而備。最其費爲緡錢二十萬。在它人若寢食不遑暇，範獨終日從容，倡道以進，其徒一警欬，一顧視，皆具第一義。學者往往得入，而其師別峯之法，遂盛行於江淮間矣。凡一寺內外，莫不粲然復興，是殿實爲之冠。慶元六年夏四月，範使其書記蜀僧祖興來求予作碑。予既盡述其始末，且爲之銘。銘曰：

海陵奧區，名寰中。長淮大江爲提封，於皇徽祖御飛龍。臣民薦福遐邇同，是邦巍然千柱宮。中有廣殿奉大雄，瓌材蔽江西。徂東波神呵護如雲從，璇題藻井翔虛空。丹碧髹堊無遺工，劫火不能壞鴻鐘。雷震鯨吼聲隆隆，層閣奉龍鸞。蹤榮光夜起騰長虹，徽祖聖德齊天崇。澤覃草木函昆蟲，咨爾梵衆極嚴恭。熙運共慶千載逢，餘福漸被兼華戎。長佑農扈消兵烽。

洞霄宮碑

造化之初，昆侖旁薄，一氣旣分。天積氣於上，地積塊於下。明爲日月，幽爲鬼神，聚爲山嶽海瀆，散爲萬物。萬物之最靈爲人，人之最靈爲聖哲，爲仙真，而道爲天地萬物之宗。幽明鉅細之統，此虛羲黃帝老子所以握乾坤司變化也。其書爲易六十四卦，道德五千言，陰符西昇度人，生神之經，列禦寇莊周關喜之書。其學者必謝去世俗，練精積神，棲於名山喬岳，略與浮圖氏同，而篤於父子之親，君臣之義，與堯舜周公孔子遺書無異。浮屠氏蓋有弗及也。臨安府洞霄宮，舊名天柱觀，在大滌洞天之下。蓋學黃老者之所廬，其來久矣。至我宋，遂與嵩山崇福宮獨爲天下宮觀之首，以寵輔相大臣之去位者，亦有以提舉洞霄召拜左相者，則其地望之重，殆與昭應景靈醴泉萬壽太一神霄寶籙爲比。它莫敢望。在真宗皇帝時，始制

詔改宮名。賜金寶牌。又賜仁和縣田十有五頃。奉齋醮。悉除其租賦。至政和間。宮以歷歲久。穿壞漫漶。徽宗皇帝降度牒三百。命兩浙轉運司復興葺之。歲度童子一人爲道士。建炎中。又廢於兵火。高宗皇帝中興大業。聞之。當寧太息。乃紹興二十五年。以皇太后之命。建昊天殿。鐘樓經閣。表以崇閎。繚以脩廡。費出慈寧宮梓匠工役。具於修內步軍司。中使臨護。犒賜踵至。旣不以命有司。而山麓之民。亦晏然不知有役。一旦告成。金碧之麗。光照林谷。鐘磬之作。聲摩雲霄。見者疑其天降地涌。而神運鬼輸也。可謂盛矣。及上脫屣萬幾。頤神物表。遂以乾道二年。自德壽宮行幸山中。駐蹕累日。勅太官進蔬膳。親御翰墨。書度人經。以賜自有天地。卽有此山。殊尤之迹。未有若此者。慶元六年九月。葆光大師宮都監潘三華。與知宮事高守中。同知宮事水丘居仁。以告山陰陸某。曰。願有紀以爲無窮之傳。某以疾未能屬稿。後三年。同知宮事王思明。與其徒李知柔。航濤江入東。繼以請。乃敍載其本末如此。且爲之銘。曰。在宋祥符。帝錫之書。乃作昭應。比隆羲圖。元豐景靈。列聖攸居。元祐上清。以祝帝儲。棟宇煌煌。煥於天衢。徽祖神霄。誕彌九區。迨我高皇。東巡於吳。瞻言天柱。鎮茲行都。警蹕來臨。神明翊扶。乃御幄殿。穆清齋居。天日下照。雨露普濡。迨今遺民。注望屬車。三聖嗣興。光紹聖謨。千礎之宮。騫騰太虛。寶磬鴻鐘。震於江湖。肆作頌詩。用紀絕殊。

卷第十七

雲門壽聖院記

雲門寺自晉唐以來名天下。父老言昔盛時。繚山竝谿。樓塔重複。依巖跨壑。金碧飛踊。居之者忘老。寓之

者忘歸。遊觀者累日乃徧。往往迷不得出。雖寺中人。或旬月不相覲也。入寺稍西。石壁峯爲看經院。又西爲藥師院。又西繚而北爲上方。已而少衰。於是看經別爲寺。曰顯聖。藥師別爲寺。曰雍熙。最後上方亦別曰壽聖。而古雲門寺更曰淳化。一山凡四寺。壽聖最小。不得與三寺班。然山尤勝絕。遊山者自淳化歷顯聖。雍熙。酌煉丹泉。闕筆倉。追想葛稚川。王子敬之遺風。行聽灘聲。而坐蔭木影。徘徊好泉亭上。山水之樂。麋飫極矣。而亭之旁。始得支徑。逶迤如線。脩竹老木。怪藤醜石。交覆而角立。破崖絕澗。奔泉迅流。喊呀而噴薄。方暑凜然以寒。正晝仰視。不見日景。如此行百餘步。始至壽聖。嶄然孤絕。老僧四五人。引水種蔬。見客不知拱揖。客無所主而去。僧亦竟不知辭謝。好奇者或更以此喜之。今年予來南。而四五人者相與送予。至新谿。且曰。吾寺舊無記。願得君之文。磨刻崖石。予異其朴野。而能知此也。遂與爲記。然憶爲兒時。往來山中。今三十年。屋益古。竹樹益蒼老。而物色益幽奇。予亦有白髮久矣。願未知予之文辭。亦能少加老否。寺得額以治平某年某月。後九十餘年。紹興丁丑歲十一月十七日。吳郡陸某記。

寧德縣重修城隍廟記

禮不必皆出於古。求之義而稱。揆之心而安者。皆可舉也。斯人之生。食稻而祭先嗇。衣帛而祭先蠶。飲而祭先酒。畜而祭先牧。猶以爲未。則凡日用起居所賴者。皆祭。祭門祭竈。祭中。靈之類是也。城者以保民。禁奸通節內外。其有功於人最大。願以非古黜其祭。豈人心所安哉。故自唐以來。郡縣皆祭城隍。至今世尤謹。守令謁見。其儀在他神祠上。社稷雖尊。特以令式從事。至祈禳報賽。獨城隍而已。則其禮顧不重歟。寧德爲邑。帶山負海。雙巖白鶴之嶺。其高摩天。其嶮立壁。負者股栗。乘者心掉。飛鸞關井之水。濤瀾洶湧。蛟

鰥出沒登舟者涕泣與父母妻子別。已濟者同舟更相賀。又有氣霧之毒。鼉龜蛇蠶守宮之蠱。郵亭逆旅。往往大署牆壁。以道出寧德爲戒。然邑之吏民獨不得避。則惟神之歸。是以城隍祠比他邑尤盛。祠故在西山之麓。紹興元年。知縣事趙君誄之始遷於此。二十八年五月。權縣事陳君摠復增築之。高明壯大。稱邑人尊祀之意。旣成。屬某爲記。某曰。幽顯之際遠矣。惟以其類可感。故古之祭者必思其所嗜好。夫神之所以爲神。惟正直。所好亦惟正直。君儻無愧於此。則擲澗谿之毛。挹行潦之水。足以格神。不然。豐豆碩俎。是諂以求福也。得無與神之意異邪。旣以勵君。亦以自勵。又因以勵邑人。八月一日。右迪功郎主簿陸某記。

灞亭記

灞山道人廣勤廬於會稽之下。伐木作亭。苦之以茆。名之曰灞亭。而求記於陸子。吾聞鄉居邑處。父兄弟相扶持以生。相安樂以老。且死者。民之常也。士大夫去而立朝。散之四方。功名富貴。足以老而忘返矣。猶或以不得車騎冠蓋。雍容於途。以夸其鄰里。而光耀其族。媼爲憾。惟浮屠師一切反此。其出遊惟恐不遠。其遊之日。惟恐不久。至相與語其平生。則計道里遠近。歲月久暫。以相高。嗚呼。亦異矣。勤公之心。獨不然。言曰。吾出遊三十年。無一日不思灞。而適不得歸。未嘗以遠遊夸其朋儕。其在灞亭。語則灞也。食則灞也。煙雲變滅。風雨晦冥。吾視之若灞之山。樵牧往來。老稚嘯歌。吾視之若灞之人。疏一泉。移一石。藝一草。木。率以灞觀之。恍然不知身之客也。夫人之情。無不懷其故者。浮屠師亦人也。而忘其鄉邑。父兄弟。無乃非人之情乎。自堯舜周孔。其聖智千萬於常人矣。然猶不以異於人情爲高。浮屠師獨安取此哉。則吾

勤公可謂篤於自信而不移於習俗者矣。故與爲記。紹興三十年十二月十二日記。

煙艇記

陸子寓居得屋二楹。甚隘而深。若小舟然。名之曰煙艇。客曰：異哉！屋之非舟。猶舟之非屋也。以爲似歟。舟固有高明奧麗。踰於宮室者矣。遂謂之屋。不可邪？陸子曰：不然。新豐非楚也。虎賁非中郎也。誰則不知。意所誠好而不得焉。麤得其似。則名之矣。因名以課實。子則過矣。而予何罪？予少而多病。自計不能效尺寸之用於斯世。蓋嘗慨然有江湖之思。而飢寒妻子之累。劫而留之。則寄其趣於煙波洲島。蒼茫杳靄之間。未嘗一日忘也。使加數年。男勝鉏犂。女任紡績。衣食麤足。然後得一葉之舟。伐荻釣魚。而賣芟芡。入松陵。上嚴瀨。歷石門沃洲。而還泊於玉笥之下。醉則散髮扣舷爲吳歌。顧不樂哉。雖然。萬鍾之祿。與一葉之舟。窮達異矣。而皆外物。吾知彼之不可求。而不能不眷眷於此也。其果可求歟？意者使吾胸中浩然廓然。納煙雲日月之偉觀。攬雷霆風雨之奇變。雖坐容膝之室。而常若順流放櫂。瞬息千里者。則安知此室果非煙艇也哉。紹興三十一年八月一日記。

復齋記

仲高於某爲從祖兄。某蓋少仲高十有二歲。方某爲童子時。仲高文章論議已稱成材。冠峨帶博。車騎雖容。一時名公卿皆慕與之交。諸老先生不敢少之。皆謂仲高仕進且一日千里。自從官御史。識者惟恐不得如仲高者爲之。及其承大宗正。出使一道。在他人亦足稱美仕。在仲高則謂之蹉跌。不偶可也。顧曾不煖席。遂遭口語。南遷萬里。凡七閱寒暑。不得內徙。與仲高親厚者。每相與燕遊。輒南望歎息出涕。因罷酒。

去如是數矣。然客自海上來言仲高初不以遷謫瘴癘動其心。方與學佛者遊。落其浮華。以反本根。非復昔日仲高矣。聞者皆悵然。自以爲不足測斯人之淺深也。隆興元年夏。某自都還里中。始與兄遇。視其貌。澗乎似道。聽其言。簡而盡。所謂落浮華。反本根者。乃親見之。嘗對榻語。至丙夜。謂某曰。吾名吾燕居之室。曰復齋。子爲我記。某自念少貧賤。仕而加甚。凡世所謂利欲聲色。足以敗志汨心者。一不踐其境。兀然枯槁。似可學道者。然從事於此數年。卒無毛髮之得。若仲高馳騁於得喪之場。出入於憂樂之域。而自得者。乃如此。非深於性命之理。其孰能之。某蓋將就學焉。敢極道本末。以爲復齋記。

青州羅漢堂記

隆興改元秋九月。某訪故人弈公於青山之下。與弈公別。蓋十有餘年矣。聞某至。曳杖出迎松間。黔瘠腊如殘雪。覆頂相與握手。訪問朋舊。且悲且喜。既至其居。脩廊邃屋。曲折皆有意。已而入法堂之東室。忽見澗壑巖竇。飛泉迅流。菩薩阿羅漢。翔遊其中。使人如身在峨眉天台。應接不暇。弈公從旁笑曰。此吾使工人幻爲之者也。始王君某築是庵於墓左。以資其先人之福。而請吾居焉。王君閉門讀書。未嘗少貶於世。願於吾獨委曲周盡。吾亦感其意。爲之留而弗去者十年。凡此土木金碧。以爲像設。供養之具者。積費千金。王君無絲毫計惜。而吾之心志亦竭於是矣。子爲我記。嗚呼。某不天。少罹閔凶。今且老矣。而益貧困。每遊四方。見人之有親而得致養者。與不幸喪親而葬祭之具。可以無憾者。輒悲痛流涕。愴然不知生之爲樂也。聞王君之事。旣動予心。又況弈公勤勤之意乎。記其可辭。明年七月一日。甫里陸某記。

鎮江府城隍忠祐廟記

漢將軍紀侯以死脫高皇帝於滎陽之圍。而史失其行事。司馬遷班固作列傳。弗載也。維宋十一葉天子駐蹕吳會。改元乾道。正月甲子。右中奉大夫直敷文閣知鎮江府方滋言。府當淮江之衝。屏衛王室。號稱大邦。自故時祠紀侯爲城隍神。莫知其所以始。然實有靈德。以芘其邦之人。禱祈禴禋。昭答如響。紹興隆興之間。虜比入塞。金鼓之聲。震於江壖。吏民不知所爲。則惟神之歸。雖虜畏天子威德。折北不支。退舍請盟。府以無事。至於流徙蔽野。兵民參錯。而居處弗驚。疾癘以息。則神實陰相之。吏其敢貪神之功以爲己力乎。謹上尙書。願有以褒顯之。以慰父兄弟之心。越三月癸丑。有詔賜廟額曰忠祐。詔下而方公爲兩浙轉運副使。右朝散大夫直徽猷閣呂公擢來知府事。修上之賜。五月癸亥。大合樂。盛服齊莊。躬致上命。神人協心。霧雨澄霽。靈風肅然。來享來臨。於是呂公以屬某曰。願有紀焉。某惟紀侯忠奮於一時。而暴名於萬世。功施於漢室。而見褒於聖宋。身隕於滎陽。而血食於是邦。士惟力於爲善而已。豈有有其善而不享其報者乎。吏之仕乎是邦者。必將有事於廟。有事於廟者。必將有考於碑。其尙知所勉焉。毋爲神羞。六月癸未記。

黃龍山崇恩禪院三門記

自浮屠氏之說盛於天下。其學者尤喜治宮室。窮極侈靡。儒者或病焉。然其成也。無政令期會。惟太平久。公私饒餘。師與弟子四出丐乞。積累歲月而後能舉。其壞也。無衛守誰何。一日寇至。則立爲草莽丘墟。故天下亂則先壞。治則後成。予於是蓋獨有感焉。黃龍山方南公時。學者之盛名天下。而其居亦稱焉。中更夷狄盜賊大亂之後。學者散去。施者弗至。昔之閎壯鉅麗者。嘗委地矣。自庚申訖丁亥。二十餘年之間。乃

能粲然復興樓塔殿閣空翔地踊鐘魚之聲聞十餘里法席之盛殆庶幾南公時是非兵革之禍不作遠方之氓蕃息阜安得以其公賦私養之餘及於學佛者則此山且爲虎狼魍魅之所宅矣而安能若是哉禪師升公於其寺門之成也屬予爲記予謂升公方以身任道起其法於將墜門蓋未足言獨書予所感使凡至山中者皆知前日之禍亂嘗如此而國家之覆轡函育斯民若是其深吏勤其官民力其業相與思報上之施焉升公豈不得所願哉乾道三年正月十四日左通直郎陸某記

王侍御生祠記

乾道七年二月知夔州濟南王公新作貢院成越三月夔歸萬施梁山大寧六郡之士不謀同辭曰夔雖號都督府而僻在巴峽無贏財羨工公之爲是役也寸寸銖銖心計而手度之累月乃成形容爲癯髮爲盡白其德於士豈有旣邪盍思所以報者乃相與築祠於院之東堂畫像惟肖又相與屬予記之予曰公之施厚矣祠未足報也士則曰吾等將日夜勉於學父兄詔子弟於家長老先生訓諸生於鄉期有以應有司之求如是足乎予曰未也郡國貢士於天子天子命近臣與館閣文學之士選其尤者而親策之於廷策旣上天子爲親第其名謂之進士進士將相儲也自是而起於朝其任政事毋伏嘉言毋醜衆正其任言責毋比大吏毋置宵人其任百執事守節秉誼宿道鄉方毋懷諛毋服讒使天下稱之史臣書之曰是夔州所貢士也士以是報公公以是報天子迺可無媿而予於記亦無愧辭矣若何皆曰唯敢不力乾道七年三月十五日左奉議郎通判軍州主管學事兼管內勸農事陸某記

東屯高齋記

少陵先生晚遊夔州。愛其山川。不忍去。三徙居。皆名高齋。質於其詩。曰次水門者。白帝城之高齋也。曰依藥餌者。瀼西之高齋也。曰見一川者。東屯之高齋也。故其詩又曰。高齋非一處。予至夔數月。弔先生之遺迹。則白帝城已廢爲丘墟。百有餘年。自城郭府寺。父老無知其處者。況所謂高齋乎。瀼西蓋今夔府治所。畫爲阡陌。裂爲坊市。高齋尤不可識。獨東屯有李氏者。居已數世。上距少陵。財三易主。大曆中。故券猶在。而高齋負山帶谿。氣象良是。李氏業進士名襄。因郡博士雍君大椿。屬予記之。予太息曰。少陵天下士也。早遇明皇肅宗。官爵雖不尊顯。而見知實深。蓋嘗慨然以稷離自許。及落魄巴蜀。感漢昭烈諸葛丞相之事。屢見於詩。頓挫悲壯。反覆動人。其規模志意。豈小哉。然去國寢久。諸公故人。熟視其窮。無肯出力。比至夔。客於柏中丞嚴明府之間。如九尺丈夫。俛首居小屋下。思一吐氣而不可得。予讀其詩。至小臣議論絕。老病客殊方之句。未嘗不流涕也。嗟夫。辭之悲。乃至是乎。荆卿之歌。阮嗣宗之哭。不加於此矣。少陵非區區於仕進者。不勝愛君憂國之心。思少出所學佐天子。興正觀開元之治。而身愈老。命愈大謬。坎壈且死。則其悲至此。亦無足怪也。今李君初不踐通塞榮辱之機。讀書絃歌。忽焉忘老。無少陵之憂。而有其高。少陵家東屯。不泱歲。而君數世居之。使死者復生。予未知少陵自謂與君孰失得也。若予者。仕不能無媿於義。退又無地可耕。是直有慕於李君爾。故樂與爲記。乾道七年四月十日。山陰陸某記。

樂郊記

李晉壽一日圖其園廬。持示余。曰。此吾荊州所居名樂郊者也。荊州故多賢公卿。名園甲第相望。自中原亂。始以吳會上流。常宿重兵。而衣冠亦遂散去。太平之文物。前輩之風流。蓋略盡矣。獨吾樂郊。日加葺。文

竹奇石。蒲萄來禽。芍藥蘭茝。菱芡菡萏之富。爲一州冠。其尤異者。往往累千里。致之子幸爲我記。予官峽中。始與晉壽相識。長身鐵面。音吐鴻暢。遇事激烈奮發。以全軀保妻子爲可鄙。其意氣豈不壯哉。及爲客置酒。出佳侍兒。陳書畫琴奕。相與娛嬉。則雍容都雅。風味乃甚可愛。雖梁宋間少年貴公子。不能過。蓋其多材藝。知弛張如此。然自少時。不喜媒聲利。有官不仕。窮園林陂池之樂者。且三十年。每自謂泉石膏肓。及來夔州。諸公始大知之。合薦於朝。議者謂晉壽當以少伸於世爲喜。而晉壽顧不然。獨眷眷於樂郊。不忍暫忘。嗚呼。出處一道也。仕而忘歸。與處而不能出者。俱是一癖。未易是泉石。非鐘鼎。諸公之薦。蓋矻晉壽膏肓。而使爲世用。異時晉壽成功而歸。高牙在前。千兵在後。擅畫繡之榮。以賁斯園。荆楚多秀民。尙有能賦其事者乎。乾道七年六月十日。笠澤陸某記。

對雲堂記

巫故郡。自秦以來。見於史。其後罷郡。猶爲壯縣。杜少陵扁舟下白帝。過焉。爲賦歸字韻五字詩。詩傳天下。由是巫縣名益重。宋建中靖國之元。黃太史始脫鈎黨。自蜀之荆。訪少陵遺迹。客縣治之東堂。留字壁間。有坐臥對南陵雲山陰晴變態之語。距乾道辛卯。逾一甲子。無舉出者。郵城李德修來爲令。風流儒雅。翩翾佳公子。因廢址作堂。與客落之。舉酒屬山陰。陸務觀曰。子爲予名。且記復興之歲月。務觀旣取太史語名之。且曰。僕行年五十。閱世故多矣。所謂朝夕百變者。奚獨雲山哉。一日。進此道。幻譬消情。塵滅眞實相見。雖巍乎天地。浩乎古今。變壞不停。與浮雲遊塵。空華眚暈。初無少異也。德修方吏退時清。坐堂上。試以僕言觀之。德脩名普。務觀名某。臘月乙卯之夕。大醉中。秉燭梅花下記。

靜鎮堂記

四川宣撫使故治益昌。樞密使清源公之爲使也。始徙漢中。卽以郡治爲府。郡自兵火滌地之後。一切草創。公至未幾。凡營壘廩庫吏士之廬。皆築治之。使堅壯便安。可以支久。而府獨仍其故。西偏有便坐。日受羣吏謁見。與籌邊治軍。燕勞將士。靡不在焉。而其壞尤甚。公既留三年。官屬數以請。始稍加葺。易其傾撓。徹其蔽障。不費不勞。挾日而成。會上遣使持親詔。賜黃金匱寶熏珍劑。以彰殊禮。公遂摭詔中靜鎮坤維之語。名新堂曰靜鎮。而命其屬陸某記之。某辭謝不獲命。則再拜言曰。以才勝物易。以靜鎮物難。以靜鎮物。惟有道者能之。泰山喬嶽之出雲雨。明鏡止水之照毛髮。則靜之驗也。如使萬物並作。吾與之逝。衆事錯出。吾爲之變。則雖弊精神。勞思慮。而不足以理小國寡民。況任天下之重乎。歲庚寅。某自吳適楚。過廬山東林。山中道人爲某言。公嘗憩此院。閉戶面壁。終夏不出。老宿皆愧之。則公之刳心受道。蓋非一日矣。世徒見公馳騁於事功之會。而不知公枯槁澹泊。蓋與山棲谷汲者無異。徒見公以才略奮發。不數歲取公輔。而不知公道學精深。尊德義。斥功利。卓乎非世俗所能窺測也。而上獨深知之。故詔語如此。傳曰。知臣莫若君。詎不信哉。雖然。某以爲今猶未足見公也。虜暴中原久。腥聞於天。天且悔禍。盡以所覆界上。而公方弼亮神武。紹開中興。異時奉鑾駕。奠京邑。屏符瑞之奏。抑封禪之請。卻涓橋之朝。謝玉關之質。然後能究公靜鎮之美云。乾道八年七月二十五日。門生左承議郎權四川宣撫使司幹辦公事兼檢法官陸某謹記。

卷第十八

藏丹洞記

漢嘉郡治之西偏望雲樓東有石穴。天將雨輒出雲氣。予疑而發之。則石室屹立。室之前地中獲瓦缶。燻矮貯丹砂雲母奇石。或爛然類黃金。意其金丹之餘也。悉斂而積藏。輸諸府庫。緘識惟謹。予嘗讀丹經言古得道至人藏丹留於名山。非常仙者輒不見。雖見亦輒變化。今是丹不藏名山而近在官寺之側。予以塵垢衰病之餘。又輒見之。是與丹經之說大異。或謂丹藏於此遠矣。方上古未爲城邑時。西望三峨。東帶大江山。川秀傑。蓋宜爲仙真鍊藥騰舉之地。至予輒見之者。豈神物隱見有時。而予適逢其時。與丹之伏而不見者常多。見者常寡。雖嵇叔夜葛稚川不免齎恨以蛻。而予顧得見焉。茲非幸與。乾道九年秋八月辛未。山陰陸某記。

籌邊樓記

淳熙三年八月既望。成都子城之西南。新作籌邊樓。四川制置使知府事范公舉酒屬其客。山陰陸某曰。君爲我記。按史記及地志。唐李衛公節度劍南。實始作籌邊樓。廢久。無能識其處者。今此樓望犍爲。犍道黔中。越雋諸郡。山川方域。皆略可指。意者衛公故趾。其果在是乎。樓旣成。公復按衛公之舊圖。邊城地勢險要。與蠻夷相入者。皆可考信不疑。雖然。公於邊境。豈真待圖而後知哉。方公在中朝。以洽聞強記。擅名一時。天子有所顧問。近臣皆推公對。莫敢先者。其使虜而歸也。盡能道其國禮儀刑法。職官宮室城邑制度。自幽薊以出。居庸松亭關。並定襄五原。以抵靈武朔方。古今戰守離合。得失是非。一皆究見本末。口講

手畫委曲周悉。如言其闕內事。雖虜耆老大人。知之不如是詳也。而況區區西南夷。距成都或不過數百里。一登是樓。在目中矣。則所謂圖者。直接故事而已。請以是爲記。公慨然曰。君之言過矣。予何敢望衛公。然竊有幸焉。衛公守蜀。牛奇章方居中。每排沮之。維州之功。旣成而敗。今予適遭清明寬大之朝。論事薦吏。奏朝入而夕報。可使衛公在蜀。適得此時。其功烈壯偉。詎止取一維州而已哉。某曰。請併書公言。以詔後世。可乎。公曰。唯唯。九月一日記。

銅壺閣記

天下郡國。自譙門而入。必有通達。達於侯牧治所。惟成都獨否。自劍南西川門以北。皆民廬市區軍壘。折而西。道北爲府。府又無臺門。與他郡國異。考其始。盡自孟氏國除。矯霸國之僭侈而然。至蔣公堂來爲牧。乃南直劍南西川門西北。距府五十步。築大閣曰銅壺。事書於史。崇寧初。以火廢。政和中。吳公拭因其矩。復侈大之。雄傑閎深。始與府稱。淳熙二年夏六月。今敷文閣真學士范公。以制置使治此府。始至。或以閣壞告。公曰。失今不營。後費益大。於是躬自經畫。趣令而緩期。廣儲而節用。急吏而寬役。一旦崇成人。徒駭其山立。翬飛。巖然摩天。不知此閣已先成於公之胸中矣。夫豈獨閣哉。天下之事。非先定素備。欲試爲之。事已紛然。始狼狽四顧。經營勞弊。其不爲天下笑者鮮矣。方閣之成也。公大合樂。與賓佐落之。客或舉觴壽公曰。天子神聖英武。蕩清中原。公且以廊廟之重。出撫成師。北舉燕趙。西略司并。挽天河之水。以洗五。六十年腥羶之污。登高大會。燕勞將士。勒銘奏凱。傳示無極。則今日之事。蓋未足道。識者以此知公舉大事不難矣。其可闕書。四年四月己卯。朝奉郎主管台州崇道觀陸某記。

彭州貢院記

國家三歲一貢士。天子先期爲下詔書，與郊祀天地埒，及試於禮部。既中選矣，天子親御殿發策，詢天下事，第其高下，又親御殿賜以科名，其禮可謂重矣。蓋以爲所與共代天理物，而守宗廟社稷於無窮者，實在此也。然則郡國貢士，顧可不重邪？彭州舊無貢院，每科舉，輒寓佛祠，祠乃在城外，士不以爲便。淳熙三年，知州事王公敦詩通判州事鄧公樞始采進士穆滂陳仲山楊倫蘇松等議，取廢驛故地爲貢院。凡郡之士奔走後先，肩袂相屬，巒堅材良，山積雲委。自正月壬子至七月癸亥，訖事，用緡錢萬五千六百有奇。役工稱是重門大堂，高閣邃深，繚以脩廡，沈沈翼翼，分職庀事，各有攸處。既成，王公徙利州，路轉運判官書來屬予爲記。鄧公又繼以請，明年正月，朝奉大夫王公序來知州事，則又以請，予發書歎曰：俗壞久矣，上下相戾，後先相傾者，天下皆是也。今彭之士大夫與王公鄧公謀同心協，若出一人，固已異矣。後王公事不出己，而不忌其成，不揜其能，惟懼後之無傳，可不謂賢哉！使士之貢於朝而仕者，揆時之宜，從人之欲，以舉萬事，如王公鄧公視人之善，若己有之，如後王公則利澤被元元，勳業垂竹帛，將孰禦焉！士尙知所勉哉！四年五月丁未，朝散郎主管台州崇道觀陸某記。

撫州廣壽禪院經藏記

淳熙己亥冬十二月，予使江西，治在撫州。其東是爲廣壽禪院，每出輒過焉。僧守璞方爲輪藏，予之始至也，纔屹立十餘柱，其上未瓦，其下未甃，其旁未垣，經未匾，其止山立，其作雷動，神呵龍負，可怖可愕。丹堊金碧，殆無遺功，而守璞儼然燕坐，爲其徒說出世間法。土木梓匠之間，不至丈室，若未嘗有是役者。比

明年冬十一月予被命詣行在所。璞乃礪石乞予爲記。予慨然語之曰：子棄家爲浮屠氏，祝髮壞衣，徒跣行乞，無冠冕軒車府寺以爲尊也，無官屬胥吏徒隸以爲奉也，無鞭笞刀鋸圜圜桎梏，與夫金錢粟帛爵秩祿位以爲刑且賞也。其舉事宜若甚難，今顧能不動聲氣於期歲之間，成此奇偉壯麗百年累世之迹，予切怪士大夫操尊權，席利勢，假命令之重，耗府庫之積，而翫歲愒日，事功弗昭，又遺患於後，其視子豈不重可愧哉！旣諾其請，又具載語守樸者，以勵吾黨云。是月十九日朝請郎提舉江南西路常平茶鹽公事賜緋魚袋陸某記。

成都犀浦國寧觀古楠記

予在成都嘗以事至沈犀，過國寧觀，有古楠四，皆千歲木也。枝擾雲漢，聲挾風雨，根入地不知幾百尺，而陰之所庇，車且百兩，正晝日不穿漏。夏五六月，暑氣不至，凜如九秋。成都固多壽木，然莫與四楠比者。予蓋愛而不能去者，彌日有石刻立廡下，曰：是仙人遽君手植，予歎曰：神仙至人，手之所觸，氣之所呵，羸疾者起，盲聵者愈，榮茂枯朽，而金玉瓦石不難。況其親所培植哉！久而不槁，不死固宜。欲爲作詩文，會多事不果。嘗以語道人遽昌老，真叟以爲恨。予旣去蜀三年，而昌老以書萬里屬予曰：國寧之楠，幾伐以營繕，郡人力全之，僅乃得免，懼卒不免也。君爲我終昔意，予發書且歎且喜，夫勿翦憩棠，恭敬桑梓，愛其人及其木，自古已然。姑以蜀事言之，則唐節度使取孔明祠柏一小枝爲手板，書於圖志，今見非誣。蔣堂守成都，有美政，止以築銅壺閣，伐江濱廟一木，坐謠言罷，亦書國史。且王建孟知祥父子，專有西南窮土木之侈，沈犀近在國城數十里間，而四楠不爲當時所取，彼猶有畏而不敢者，況今聖主以恭儉化天下，有夏

禹卑宮室。漢文罷露臺之風。專闔方面。皆重德偉人。豈其殘滅千歲遺迹。修大棟宇。爲王孟之所難哉。意者特出於吏胥梓匠。欺罔專恣。以自爲功而已。使有以吾文告之者。讀未終篇。禁令下矣。然則其可不書。淳熙九年六月一日。朝奉大夫主管成都府玉局觀山陰陸某記。

書巢記

陸子旣老且病。猶不置讀書。名其室曰書巢。客有問曰。鵲巢於木。巢之遠人者。燕巢於梁。巢之襲人者。鳳之巢。人瑞之。梟之巢。人覆之。雀不能巢。或奪燕巢。巢之暴者也。鳩不能巢。伺鵲育雛而去。則居其巢。巢之拙者也。上古有有巢氏。是爲未有宮室之巢。堯民之病水者。上而爲巢。是爲避害之巢。前世大山窮谷中。有學道之士。棲木若巢。是爲隱居之巢。近時飲家者流。或登木杪。酣醉叫呼。則又爲狂士之巢。今子幸有屋以居。牖戶牆垣。猶之比屋也。而謂之巢。何邪。陸子曰。子之辭辯矣。顧未入吾室。吾室之內。或栖於櫬。或陳於前。或枕藉於床。俯仰四顧。無非書者。吾飲食起居。疾痛呻吟。悲憂憤歎。未嘗不與書俱。賓客不至。妻子不覲。而風雨雷雹之變。有不知也。間有意欲起。而亂書圍之。如積槁枝。或至不得行。則輒自笑曰。此非吾所謂巢者耶。乃引客就觀之。客始不能入。旣入又不能出。乃亦大笑曰。信乎其似巢也。客去。陸子歎曰。天下之事。聞者不如見者。知之爲詳。見者不如居者。知之爲盡。吾儕未造夫道之堂奧。自籬籬之外。妄議之。可乎。因書以自警。淳熙九年九月三日。甫里陸某務觀記。

景迂先生祠堂記

明州船塢新作故侍讀晁公祠成。監場事襄陽王君鉛。因通判州事丹陽蘇君玘移書某爲之記。自春徂

秋凡十許書。請不倦。某於公爲彌甥。方踰學步時。已獲拜公。則今於爲記。誠不當以薄陋辭。謹按公諱說之字。以道一字。伯以父。自號景迂生。元豐元祐間。已爲知名士。崇寧後。坐上書邪等。斥不得立朝。臨民故連爲祠廟。筦庫吏。其爲船場。則大觀政和間也。寓舍直桃華渡。而官寺有亭。曰超然。公方爲世僂人。士夫遇諸途。噤莫敢語。況有拜牀下者。簿書稍暇。則以讀書爲樂。時時見於文章。如汪伯更哀辭。祭鄒忠公文。皆傳天下。亦間與爲佛學者。延慶明智師遊。論著所謂天台教。至今其徒以爲重。雖然。此猶未足言公也。公之學深且博矣。於易自商瞿。下至河南邵先生。於書自伏生。下至泰山姜先生。於詩雜以齊魯韓三家。不枯於毛鄭。於春秋考至賈誼董仲舒。不膠於啖趙。其所引據。多先秦古書。藏山埋冢之秘。卓乎獨立。確乎自信。雖引天下而與之爭。不能奪。卒成一家之說。與諸儒並傳。向非擯斥。疏置於荒遠寂寞之地。如在船場時。則雖公之敏。此功未易成也。於庠士之棄。曰。豈皆馳騫於富貴功名哉。弊精神於事爲之末。謀衣食於涯分之外。忽焉不知老之至者多矣。登堂而望公之風采。讀記而稽公之學術。其亦可自省哉。公之文章。本二百卷。中原喪亂後。其家復集之。益以南渡至歿時所作。纔得六十卷。而士大夫猶未盡見也。郡人能言公舊事者。曰。一日。部使者來治船事。詬責甚峻。公從容對曰。船待木乃成。木非錢不可致。今無錢致木。則無船適宜。使者爲發愧去。觀公平生大節。一言折庸人之驕。蓋不足書。而郡人所願書。故亦不敢略云。淳熙十年九月丁丑。朝奉大夫主管成都府玉局觀山陰陸某記并書。

圓覺閣記

淳熙十年某月某日。徑山興慶萬壽禪寺西閣落成。會是歲某月某日。詔賜住持僧寶印御注圓覺經。且

命某爲之序。於是道俗咸曰：賜經與閣成同時，宜勝曰：圓覺之閣，且刻石以侈盛事。於是又咸曰：陸某宜爲記。寶印以衆言來，論某於山陰大澤中，某蹴然不敢辭。恭惟聖天子以聰明睿智之資，體堯蹈舜，深造道妙，悟一心於萬法之中，旣已博極皇墳，典義圖魯史之祕，而象胥所傳，木葉旁行，亦莫不究極。以大圓覺爲我世界，悼士之陋，多岐私智，昧乎大同，乃以萬機之餘，親御訓釋，凡十二士之所問，調御之所說，佛陀波羅之所譯，宗密之所注，裴休之所言，皆冰釋縷解於宸筆之下。十日並照，物無遁形，百川東歸，海無異味。如旣望月，無有缺減，如大寶鏡，莫不照了。東夷南蠻，西戎北狄，霜露所墜，日月所照，莫不共此大圓覺中。魯之逢掖，楚之黃冠，笠乾之染衣，祝髮，平時相與爲矛盾，爲冰炭者，亦莫不共在此大圓覺中。不偏不欠，不迷不謬，垂之千萬億世，亦莫不然。而寶印以山林枯槁之士，名徹九重，得以大覺禪師，懷璉入侍。仁宗皇帝故事，覲清光，承聖問，受好賜，序鉅典，又此閣壯麗，首冠一山，費至三十萬錢，其落成也，適當賜經之時，山川動色，神龍踴躍，於虜盛哉！方閣之未建也，東偏有千僧閣，紹興中大慧禪師宗杲法門之傑，方住山時，衆盜千數，故以是名閣。然自今觀之，雖阿僧祇衆，猶爲有有限量也。豈若圓覺之廣大無邊也哉！顧某衰且病，學問廢落，文思局澁，而名山盛事，本末闕闕，非區區筆力所能演述，實以爲愧懼云。淳熙十年十一月十四日，朝奉大夫主管成都府玉局觀陸某記。

能仁寺捨田記

淳熙十三年三月乙巳，承節郎河東薛純一詣紹興府，自言生長太平，蒙被德澤，念亡益縣官，不勝悽悽報國之心，願以家所有山陰田千一百畝，歲爲米千三百石有奇，入大能仁禪寺，祝兩宮聖壽，安撫使龍

圖丘公視牒異之。問所以然。純一曰。昔漢卜式上書。願輸家財半助邊。且曰。天子誅匈奴。愚以爲賢者宜死節。有財者而輸之。如此可滅也。今天子垂拱穆清。北虜讐服。歲時奉貢。純一弗獲傾貲備軍興。一日費。故因像教爲兩宮祈年。誠愚慙不識法令。罪死不宥。願言之朝。卽伏斧鑕。不敢悔。於是龍圖公嘉其意。爲上尙書戶部。純一乃因寺之住持僧子昕來告。子請撰次本末爲記。子辭謝不可。則語之曰。子雖列在男爵。曩嘗舉進士。試禮部。繼今能益修其業。以自致於顯榮。則所以報國者。豈若是而已。雖然。子已足以勵風俗。助教化。使貪冒者廉。怠忽者奮。享祿賜而忘報者愧。豈不可書也哉。田之頃畝賦役。及別以錢權其子本。以待凶歲。則具書於碑陰。俾後有考焉。五月十三日記。

常州開河記

隋疏大渠。自今京口毗陵姑蘇嘉興以抵於臨安。初以備巡幸。而後世因爲漕運大利。故得不廢。渠貫毗陵城中。徐行東注。獨南水門受荆溪之水。爲惠明河。釀爲二股。皆會於金斗門。慶曆中。太守國子博士李公餘慶始疏顧塘河。益引惠明水注之。漕渠顧塘地勢在漕渠後。故俗又謂之後河。崇寧初。太守給事中朱公彥復增濬之。方是時。毗陵多先生長者。以善俗進。後學爲職。故儒風蔚然。爲東南冠。及余公中霍公端友皆策名天下士第一。則說者遂歸之後河。曰。是爲東南文明之地。鄒忠公方居鄉。士所尊事而化服者。忠公避不敢居。因以後河實之。而爲作記。淳熙十四年。今太守林公下車逾年。旣尊禮其諸老先生。延見其秀民。所以表勵風俗而激勸儒學者。日夜不敢少怠。絃歌之盛。殆軼於承平時矣。而或以後河告者。亦不廢也。後河自崇寧後。不治者積數十年。中更兵亂。民積瓦礫。及治家棄滓。故地益堅确。夏六月。林公

乃蒐閑卒捐羨金分命其屬治之不淹旬渠復故道袤若干深若干脩若干乃以書屬予曰願記其事予謂渠之興自爲一郡之利不必爲士之舉有司者設然城南衣冠以杜固鑿而頓減則後河成廢與士之舉有司者相爲盛衰亦自有理太王遷岐成王都洛皆觀川原咨卜筮其由來蓋尙矣則林公兼取焉顧不可哉士益勉之以毋負公之意公名祖浴字子禮明州鄞人世以經行顯云渠成之歲十二月二日記

卷第十九

明州育王山買田記

紹興元年高皇帝行幸會稽詔明州阿育王山廣利禪寺上仁宗皇帝賜僧懷璉詩頌親札念無以鎮名山懋衆志乃書佛頂光明之塔以賜又申以手詔特許買田贍其徒逾五十年未能奉詔佛照禪師德光以大宗師自靈隱歸老是山慨然曰僧寺毋輒與民質產令也今特許勿用令高皇帝恩厚矣其可弗承且昔居靈隱時壽皇聖帝召入禁闥顧問佛法屢賜金錢其敢爲他費乃盡以所賜及大臣長者居士脩供之物買田歲去穀五千石而遣學者義銛求記於陸某某方備史官其紀高皇帝遺事職也不敢辭惟茲四明表海大邦自嘉祐紹興兩賜宸翰雲漢之章下飾萬物於是山君波神効珍受職龜鼈蛟鱓弭伏退聽惡氣毒霧收斂澄廓萬里之舶五方之賈南金大貝委積市肆不可數知陂防峭壑年穀登稔於摩盛哉今德光又廣上賜斬兩宮之壽植天下之福無疆惟休時萬時億刻之金石於是爲稱咨爾學者安食其間明已大事傳佛大法報上大恩將必有在不然不耕而食旣飽而嬉厲民以自養豈不甚可愧哉

淳熙十六年十一月二十四日朝議大夫尙書禮部郎中兼實錄院檢討官陸某記。

建寧府尊勝院佛殿記

建寧城東永安尊勝禪院。成於唐僖昭間。壞於建炎之末。稍葺於紹興之庚申。自佛殿始。方是時。院大壞。塗地。趣於復立。以慰父老心。故不暇爲支久計。未四十年。遽復頽圯。適懷素者來。爲其長老。乃慨然曰。殿大役也。舍是弗先。吾則不武。乃廣其故基。北南西東各三尺。意氣所感。助者四集。瓌材珍產。山積雲委。其最巨者。石痕村之杉。脩百有三十尺。圍十有五尺。其餘蓋稱是。凡費錢三百萬有奇。而竹木輒斃黜。聖之施者。工人役夫之樂助者。不在是數。其成之歲月。淳熙戊申冬十一月庚子也。越四年。紹熙辛亥五月。予友人方君伯謨。移書爲懷素求文爲記。予爲之言曰。世多以浮屠人之舉事。謂吾士大夫。以爲彼無尺寸之柄。爲其所甚難。而舉輒有成。士大夫受天子爵命。挾刑賞予奪。以臨其吏民。何往不可。而熟視蠹弊。往往憚不敢舉。舉亦輒敗。何邪。予謂不然。懷素之來。爲是院。固非有積累明白之效。佛殿方壞。而院四壁立。今日食已。始或謀明日之食。懷素坐裂瓦折桷腐柱頽垣之間。召工人持矩度。謀增大其舊。計費數百萬。未有一錢儲也。使在士大夫。語未脫口。已得狂名。有心者疑。有言者謗。遂而去之。久矣。浮屠人則不然。方且出力爲之先後。爲之輔翼。爲之禦侮。歷十有四年如一日。此其所以巋然有所成就。非獨其才異於人也。以十四年言之。不知相之拜者幾人。免者幾人。將之用者幾人。黜者幾人。禮樂學校。人主所與對越天地。作士善俗。與夫貨財刑獄足用。而弼教藩翰之臣。古所謂侯國者。大抵倏去忽來。吏不勝紀。彼懷素固自若也。則其有成。曷足怪哉。且懷素之爲是院。不獨致力於佛殿。凡所謂堂寢之未備者。廊廡之朽敗者。

皆一新之。今老矣，無他從意，使不死，復十四年，或過十四年，皆未可知也。則是院之葺，又可前知邪？而士大夫凜凜拘拘，擇步而趨，居其位不任其事，護藏蠹萌，傳以相諉，顧得保祿位，不蹈刑禍，爲善自謀，其知恥者，又不過自引而去爾。天下之事，竟孰任之於虜，是可歎也已。懷素三衢人，少從道行禪師游，能得其學。伯謨名士，繇莆陽人。六月甲申，中奉大夫提舉建寧府武夷山冲佑觀陸某記。

紹興府脩學記

八卦有畫三墳有書，經之原也。典教有官，養老有庠，學之始也。歷世雖遠，未之或異。不幸自周季以來，世衰道微，俗流而不返，士散而無統，亂於楊墨，賊於申韓，大壞於釋老，爛漫橫流，不可收拾。始有重編累簡，棲以巨輪，象龍寓人，飾黃金珂，璧怪珍之物，誘駭愚稚，而六經寢微，穹閣傑屋，上摩霄漢，黜聖髡丹，窮極工技，其費以億萬計，而學校弗治。自周衰至五代，幾二千歲，而後我宋誕生，受天命，崇經立學，以爲治本。十二聖一心，罔或怠忽，然竊嘗考之，方周盛時，天子所都，旣竝建四代之學，而又黨有庠，遂有序，畿內六鄉，鄉有黨，百五十六遂，遂有鄙，如黨之數，遂序黨庠，蓋互見之，則是千里之內，爲序十有二，爲庠三百，何其盛也。今畿內之郡，皆僅有一學，較於周不及百之二，而又不治，則爲之牧守者，得無任是責邪？會稽拱行在所，爲東諸侯之冠，宜有以宣聖化，倡郡國，而學未稱，給事中括蒼王公信來，爲是邦，政成令行，民物和樂，臺榭弗崇，陂池弗廣，而惟學校是先，燕遊弗親，廚傳弗飾，而惟養士是急，下車未久，輿殿崇閣，邃宇脩廊，講說之堂，絃誦之舍，以葺以增，不日訖事，以其饗殮未足也，則爲之售常平之田，以其見聞未廣也，則爲之求四方之書，食有餘積，書罕未見，然公猶以爲慊，曰：上丁之禮，服器未復古也，又爲之新冕弁衣裳。

帶紳佩鳥之屬。自邦侯至諸生。各以其所宜服。鼎俎尊彝豆籩簠簋之屬。自始奠至受胙。各以其所宜用。無一不如禮式。公迺齋心脩容。來宿於次。質明陟降揖遜。進退踴起。俯首屏氣。如懼弗克。禮成。士僉曰。公以躬行先我。我處於鄉。弗篤於孝悌忠信。出而仕。弗勉於廉清正直。不獨不可見公。仰天俯地。其何心。見父兄長老。其何辭。教授陳君自強與諸生。以其言來告曰。願有紀。某老病。不獲奉俎豆。以從公後。喜士之能承公也。於是乎書。紹熙二年九月癸酉。中奉大夫提舉建寧府武夷山冲佑觀陸某記。

重修天封寺記

淳熙丙午春。予以新定牧。入奏行在所。館於西湖上。日與物外人遊。多爲予言淨慈有慧明師者。歷抵諸方。如汗血駒。所至蹴蹋萬馬皆空。方是時。知其得法。而不知其能文。後四年。予屏居鏡湖上。明來訪予。談道之餘。縱言及文辭。卓然僑偉。非凡子所及。方是時。知其能文。而不知其有才。明既從予遊累日。乃曳杖負笠。入天台山。爲天封主人。是山也。巖嶂嶄絕。爲天台四萬八千丈之冠。林麓幽邃。擅智者十二道場之勝。然地偏道遠。遊者旣寡。施者益落。明居之彌年。四方問道之士。以天封爲歸。植福樂施者。踵門。還至。雖卻不可。於是自佛殿經藏。阿羅漢殿。鐘經二樓。雲堂庫院。莫不畢葺。敞爲大門。繚爲高垣。周爲四廡。屹爲二閣。來者以爲天宮。化成。非人力所能也。又哀其餘。作二庫。曰資道。曰博利。以供僧及童子級浣之用。彼庸道人。日夜走衢路。丐乞聚畜。蓋未必能辦此。明方爲其徒。發明大事。因緣錢帛穀粟之間。不至丈室。而其所立。乃超卓絕人如此。豈非一世奇士哉。予嘗患今世局於觀人。妄謂長於此者。必短於彼。工於細者。必略於大。自天封觀之。其說豈不淺陋可笑也哉。會明以書來求予文。記其寺之廢興。因告以予說。使併

刻之。庶幾覽者有所倣焉。紹熙三年三月三日。中奉大夫提舉建寧府武夷山冲佑觀山陰縣開國男食邑三百戶陸某記。

嚴州重修南山報恩光孝寺記

浙江自富春沂而上。過七里瀨。桐君山。山益秀。水益清。烏龍山。崛起千仞。鱗甲爪鬣。蜿蜒盤踞。嚴州在其下。有山直州之南。與烏龍爲賓主。烏龍以雄偉。南山以秀邃。形勢壯而風氣固。是爲太宗皇帝高宗皇帝受命賜履之邦。登高四望。則樓觀雉堞。鸞騰縈帶。在鬱葱佳氣中。兩山對峙。紫翠重複。信天下名城也。南山報恩光孝禪寺。實爲諸刹之冠。質於地志及父老之傳。唐末有僧結廬於山之麓。名廣靈菴。慶曆中始斥大之。爲廣靈寺。紹聖中。易禪林。佛印大師希祖實爲第一代。始徙寺於山巔。今寺是也。崇寧中。賜名天寧萬壽。紹興中。易今名。初。郡長者江氏爲塔七級。與寺俱燬於宣和之盜。厥後文則來居而寺復。法琦來助而塔建。及得智廓仲玘。而學者雲集。廓不期年示滅。凡今之營繕崇成者。皆玘也。如來大士有殿。演法會齋有堂。安衆有寮。棲鐘有樓。寢有室。遊有亭。浴有泉。又以餘力爲門。爲廡。爲庫。爲垣。爲磴。路爲禦。侮力士之像。未五六年。百役踵興。無一弗備。郡人童天祐。天錫。方珍。出貲爲最鉅。老僧智貴。傾其衣囊。助施爲尤難。若夫以宿世願力。來爲外護。取郡之積木以終成之者。太守殿中侍御史冷公世光也。寺之役旣成。冷公適有歸志。遂奉祠以去。豈非緣法哉。予亦嘗來爲守。廓及玘皆予所勸請。則於是山不爲無夙昔緣。故玘來求予爲記。予行天下多矣。覽觀山川形勝。考千載之遺迹。未嘗不慨然也。晚至是邦。觀烏龍似赤甲白鹽。南山似錦屏。一水貫其間。紆餘澄澈。似渭水。而南山崇塔廣殿。層軒脩廓。山光川霽。鐘鳴鯨吼。遊

者動心過者駭目。又甚似漢嘉之凌雲。蓋兼天下之異境而有之。騷人墨客將有徙倚太息援筆而賦之者。予未死尚庶幾見之。紹熙四年二月庚申記。

會稽縣重建社壇記

古者侯國地之別三爵之等五。皆有宗廟社稷。秦黜封建。置郡守縣令。於是古之命祀。惟社稷尚存。陵夷千餘載。士不知學古。吏不知習禮。其祀社稷。徒以法令從事。畿封壇壝。服器牲幣。一切苟且。取便於事。無所考法。宋興。文物寢盛。自朝廷達於下州叢邑。社稷之祀。略皆復古。不幸中更犬戎之禍。兵氛南被。吳楚中與七十年。郡縣之吏。往往惟餉軍弭盜。簿書訟獄爲急。及吏以期告漫。應曰如令。至期。又或移疾弗至。雖朝廷所班令式。或未嘗一視。況三代之舊典禮乎。會稽之爲邑。實奉陵寢。且在安撫使提點刑獄。提舉常平治所。有將迎造請之役。有符檄期會之煩。敕使內家及宗室近屬。一歲屢至。亭傳道路。舟車徒役。一有不治。責在會稽者。十居八七。故令於祀事。尤不遑暇。縣社在禮神坊。曰社。曰稷。曰風師。曰雨師。曰雷神。凡五壇。皆弗不治。祀則芟舍以爲次。凡祀之費。一出於吏。雨則寓於吳越王祠之門。承議郎四明王君時會之來。爲令。始至。周視壇所。喟然歎曰。幸爲政於此。得有人民社稷事。孰大於是者。迺卽其地。爲垣八丈。築屋四楹。有門以時其啓閉。有庫以儲其器物。用宋之櫟。豐之枌榆故事。藝松五十。又稽合制度。稿秸莞席。幣篚樽俎。豆籩簠簋。勺糝。莫不如式。棗盛酒醴。牲牢莫不供給。獻有次。祝有位。齋有禁。省饌食。爵奠幣。飲福。望燎。望瘞。有儀。祝事各以其日。王君祇敬齋栗。與其僚從事。禮成而退。無違者。會稽歲比不登。及是。雨暘時若。歲以大豐。民歌於途。農扠於野。皆曰。吾令致力於神。神實響答。吾其可忘。於是父老子弟相

與告予。請記其事。予曰：爲政之道與他知先後緩急之序而已。王君設施知所先急如此。雖欲不治得乎。雖然。是皆朝廷以班郡縣者。王君特能舉之爾。後來者顧獨不能邪。故予詳記始末。所以告無窮也。慶元二年五月二十日。中大夫提舉建寧府武夷山冲佑觀山陰縣開國男食邑三百戶陸某記。

廣德軍放生池記

古者臣之愛其君。何其至也。其禱祈之辭曰：受天百祿。曰子孫千億。曰如南山之壽。一話言。一飲食。未嘗忘君。然不聞有以羽毛鱗介之族。祈其君之福者。蓋先王盛時。山澤有虞。川林有衡。漁獵有時。數罟有禁。洋洋乎浩浩乎。物各遂其生養之宜。所謂漉陂竭澤者。蓋無有也。所謂相响以溼。相濡以沫者。蓋未見也。至於後世。德化弗行。厲禁弗施。廣殺厚味。暴殄天物。放而不知止。舍耒耜而事網罟者。日以益衆。於是。有以放生名池。用祝壽祺者。而唐顏真卿之石刻。始傳於世。宋興十三聖相繼。以深仁盛德。極高蟠厚。鳥獸魚鼈咸若矣。而四方郡國。猶相與築陂儲水。修放生故事。所以廣聖澤之餘。有不敢忽者。惟廣德軍。舊以郡圃後池爲之地隘。水泉淺涸。不與事稱。承議郎曾侯。以慶元二年來領郡事。顧而太息。曾以事至子城西。稍南。得巨溪者。延袤百步。泓渟澄澈。蒲柳列植。藻荇縈帶。水光天影。盪摩上下。爲一郡絕景。侯因其故。而加治焉。築屋於其會。名曰溪堂。民不勞財。不費煥然告成。重明節。率僚吏放鱗介千計。望行在拜手稽首。禮成而退。父老童穉。縱觀輿歎。以爲廣德爲郡以來。逾二百年。所未之有。侯移書笠澤陸某。俾爲記。某復之曰：侯奉天子詔。來爲守於此。一賦役非其時。一訟獄非其情。窮僻下里。匹夫匹婦。有一愁歎。侯之責也。能不負此責。然後足以對揚天子休命。而致歸美報上之意。放生之舉。蓋賢守善其職之一事。爾豈

特是而止哉。期年政成，將屢書之。中大夫提舉建寧府武夷山冲佑觀山陰縣開國男食邑三百戶陸某記。

鎮江府駐劄御前諸軍副都統廳壁記

鎮江府駐劄御前諸軍副都統武功大夫和州防禦使潘川夏侯君書來諗予於山陰澤中曰：吾軍有都統爲一軍大將，內以屏衛行在外，以控扼梁楚，隱然一長城也。又置副都統一員，以佐其長，智勇相資，寬猛相濟，有事則或居或行，更出迭歸，無事則同籌共畫於帳中，而制敵於千里之外，其任可謂重矣。而副都統自設官以來，今三十有八年，歷官十人，再至者一人，未有壁記。後將無所攷質，予爲我書而刻其姓名，可乎？予與夏侯君南北異鄉，東西異班，出處壯老異致，然每見其撫劍抵掌，談中原形勢，兵法奇正，未嘗不太息，恨不與之周旋於軍旅間也。君亦謂予非龔龔老書生，以兄事予，甚敬。則今日之請，尙何辭？然今天子神聖文武，承十二聖之傳，方且拓定河洛，規恢燕趙，以卒高皇帝之武功，則宿師江淮，蓋非久計。夏侯君亦且與諸將移屯玉關之西，天山之北矣。予雖老，尙庶幾見之。慶元四年正月甲子，陸某記。

法雲寺觀音殿記

浙東之郡，會稽爲大，出會稽城西門，循漕渠行八里，有佛刹曰法雲禪寺。寺居錢塘會稽之衝，凡東之士大夫仕於朝，與調官者，試於禮部者，莫不由寺而西，餞往迎來，常相屬也。富商大賈，捩柁挂席，夾以大艫，明珠大貝，翠羽瑟瑟之寶，重載而往者，無虛日也。又其地在鏡湖下，灌溉溇泄，最先一邦，富比封君者，家相望也。故多施者，寺易以興。然建炎庚戌，胡虜之禍，亦以近官道，首廢於火，一瓦不遺。主僧曰道亨，爲一

方所信。度弟子三十二人。慨然自任。以興復之事。未成者十七而沒。其後有自修者。始爲三門法堂。經藏等。予適得華嚴般若涅槃寶積數百卷。以施之。草創未畢。而修謝去。自是寺以不得人。又廢。木剪竹伐。鐘鼓不鳴。白衣攘居之。屠牛牧豕。莫敢孰何。初先楚公爲尙書左丞。請於朝。以證慈及法雲爲功德院。歲度僧一人。三年間。證慈得其二。法雲得其一。故太傅與楚公祠堂肖像具存。予自蜀歸。始言於府。請逐白衣。而命契彝者主之。彝與亨俱東陽人。人固已喜。而彝又有器局才智。居之且二十年。創佛殿及像設。費甚厚。談笑而成。重建三門翼以兩廡。巍然大剎矣。彝沒。予以告府。牧尙書葉公。以其弟子道澤繼之。澤少年志節清苦。言議英發。人皆畏其嚴。而服其公。於是予以大屋四楹。施以爲觀音大士殿。雖然。尙未易成也。澤卽日走四方。謀之三年。遂建殿。殿之雄麗冠於一刹。予又施以禪月所畫十六大阿羅漢像。龕於兩壁。觀者起敬。施者踵至。自火於庚戌。及今庚申。實七十載。殆若有數然。卒成之者。繫彝與澤父子積勤不懈之力也。予嘗謂事物廢興。數固不可逃。而人謀常參焉。予遊四方。凡通都大邑。以至遐陬夷裔。十家之聚。必有佛刹。往往歷數百千歲。雖或盛或衰。要皆不廢。而當時朝市城郭。邑里官寺。多已化爲飛埃。鞠爲茂草。過者弔古興懷。於狐嘯鬼嘯之區。而佛刹自若也。豈獨因果報應之說。足以動人。而出其財力。亦其徒堅忍強毅。不以豐凶難易變其心。子又有孫。孫又有子。必於成而後已。彼之不廢固宜。予因彝與澤之事。而有感焉。併載其說。士大夫過而稅駕者。讀之。其亦有感也夫。慶元五年秋七月庚午記。

會稽縣新建華嚴院記

會稽五雲鄉有山曰黃琢。山之麓。原野曠。水泉冽。岡巒抱負。崑嶂森立。而地蕪不治者。不知幾何年。或謂

古嘗立精舍以待天衣雲門遊僧之至者。有石刻具其事。其後寺廢石亡。獨龜趺猶在。父老類能言之。慶元三年。有信士馬君正卿聞而太息。乃與其弟崧卿。以事親收族之餘貲。買地築屋。擇僧守之。凡僧若士民之道出於此者。皆得就憩。猶以爲未廣也。則爲堂殿門廡。倉廩庖福。凡僧居之宜有者悉備。而殖產使足以贍足其徒。猶懼其不能久也。告於府牧丞相葛公。以華嚴院額徙置焉。可謂盡矣。而其意猶未已也。曰。年運而往。或者欺有司而寓其孥。則院廢矣。家世隆替不可常。萬分一有子孫以貧故。規院之產。侵院之事。則僧散矣。於是因其同學於佛者。朝奉郎致仕曾君迅叔。來請予文刻之石。庶來者知此院經理之艱勤。則不忍寓其孥。子孫知乃祖乃父志願之堅確。則不忍規其產。侵其事。設若有之。而至於有司。則賢守善令必有以處此。雖至於數百千歲。此院猶不廢也。予報之曰。僧居之廢興。儒者或謂非吾所當與。是不然。韓退之著書。至欲火其書廬其居。杜牧之記南亭。盛贊會昌之毀寺。可謂勇矣。然二公者。卒亦不能守其說。彼浮圖突兀三百尺。退之固喜其成。而老僧挈納無歸。寺竹殘伐。牧之亦賦而悲之。彼二公非欲納交於釋氏也。願樂成而惡廢。亦人之常心耳。則君之志。叔遲之請。與予之記之也。皆可以無愧矣。慶元五年八月甲子。中大夫致仕山陰縣開國男食邑三百戶陸某撰并書丹。

卷第二十

居室記

陸子治至於所居堂之北。其南北二十有八尺。東西十有七尺。東西北皆爲窗。窗皆設簾障。視晦明寒燠。

爲舒卷啓閉之節。南爲大門。西南爲小門。冬則析堂與室爲二。而通其小門以爲奧室。夏則合爲一。而闢大門以受涼風。歲暮必易腐瓦。補罅隙。以避霜露之氣。朝晡食飲。豐約惟其力。少飽則止。不必盡器。休息取調節氣血。不必成寐。讀書取暢適性靈。不必終卷。衣加損。視氣候。或一日屢變。行不過數十步。意倦則止。雖有所期處。亦不復問。客至。或見或不能見。間與人論說古事。或共盃酒。倦則亟捨而起。四方書疏。略不復遣。有來者。或亟報。或守累日不能報。皆適逢其會。無貴賤疎戚之間。足跡不至城市者。率累年。少不治生事。舊食奉祠之祿。以自給。秩滿。因不復敢請。縮衣節食而已。又二年。遂請老。法當得分司祿。亦置不復言。舍後及旁。皆有隙地。蒔花百餘本。當敷榮時。或至其下。徜徉坐起。亦或零落已盡。終不一往。有疾。亦不汲汲近藥石。久多自平。家世無年。自曾大父以降。三世皆不越一甲子。今獨幸及七十有六。耳目手足未廢。可謂過其分矣。然自記平昔於方外養生之說。初無所聞。意者日用亦或默與養生者合。故悉自書之。將質於山林有道之士云。慶元六年八月一日。山陰陸某務觀記。

邵武縣興造記

太平興國五年。詔卽建州邵武縣置邵武軍。而縣爲屬。其治在軍之東。建炎三年。盜起閩縣。邵武亦被兵。焚官寺民廬略盡。紹興十年。作譙門。十六年。作守丞治所。於是學宮軍壘。圉圍倉廩。以次皆復。其舊獨縣故地廢爲教場。而縣寓尉廨。至二十一年。知縣事葉邃始復縣治。未及成。安撫使用兵官王存之請。卽日撤除。滌地皆盡。而縣徙寓武陽驛。乾道六年。知縣事尤昂始作縣門。他猶未暇及。慶元四年。宣義郎史君定之來爲縣。始至而歎曰。縣古子男國也。因時之治。忽政之善否。以爲盛衰。自建炎己酉。訖今歲在戊午。

凡七十年。自高宗皇帝至今天子。歷四聖。寬賦薄征。休養元元。歲且屢豐。公饒私餘。生齒繁滋。考之九域。圖郡戶八萬七千九百有奇。今增五萬四千二百有奇。爲戶十四萬二千一百有奇。可謂盛矣。而邵武一邑。獨當戶五萬六千四百有奇。爲郡境十之四。則吾邑顧不又盛哉。而反寓其治於傳舍。詔勅法令。圖志符檄。護藏不嚴。棲列無所。決訟問囚。延見丞佐與賓客之來者。其地皆褊迫。庳陋仰漏。旁穿非所以宣布德澤。示民以上下之分也。念非所先。姑置弗議。比爲政期年。家無弗伸之冤。庭無弗直之訟。善無濫刑。惡無佚罰。太守趙侯不譴知君爲深。君所設施。郡未嘗以勞撓焉。以故君之政成。民之俗變。有所爲輒共成之。於是始有意於新縣治矣。會得吏蠹與用度之餘。爲錢百餘萬。自五年七月甲午鳩工。至十月己巳落成。出令有所燕息。有次。勞賓有館。胥吏徒役。咸有寧宇。貨布器物。各司其局。事立令行。老稚舞歌。視承平舊觀。有如焉。而木章竹簡。瓦甃髹丹。悉視時低昂。交手畀予。梓匠朽斲。百工之來者。得直皆如私家。訖事民不及知。吏不得沿以爲奸。非君之才有餘。顧能若是哉。堂之名有九。曰畫簾。曰無私。曰近民。曰仁平。曰居敬樓。曰瞻雲軒。曰讀書。曰如水亭。曰海棠。其扁榜多君自書。有筆法。其命名之意。卽其地可知。故不詳著君蓋故丞相太師魏公之孫。予魏公客也。故君與趙侯皆以記縣之興造爲請。予受知魏公時。甫壯歲。爾俯仰四十餘年。同時賓客凋喪略盡。而予偶獨後死。見君以才稱於世。且猶能秉筆有所紀述。亦可謂幸矣。故不復辭。慶元六年九月癸酉。中大夫直華文閣致仕陸某記。并書。

諸暨縣主簿廳記

建炎紹興間。予爲童子。遭中原喪亂。渡河沿汴。涉淮絕江。間關兵間以歸。方是時。天子暴衣露蓋。櫛風沐

雨巡狩四方。會不期月休也。大臣崎嶇於山海阻險之地。草行露宿。不敢告勞。亦宜矣。況於州牧郡守以降。遂際一厦以治其事者相望。又況降而爲縣令丞簿者哉。及王室中興。內外羸定。然郡縣吏寓其治於郵亭民廬。僧道士舍者。尙比比皆是。積累六七十年。四聖相授。天下日益無事。兵寢歲登。用度饒餘。然後皆得稍復承平之舊。至於縣。則有迨今苟且因循者。主簿在縣官中。卑於令丞。而冷於尉。非甚有才。則其舉事爲尤難。若諸暨主簿丁君崇者。可謂才矣。君海陵人也。今居吳。世有顯人爲吏。精察而平恕。學工文辭。而不忽簿書期會之事。嘗兼攝丞。久之得添給。不取一錢。皆用以新主簿之廩。諸暨舊無丞。元豐間置丞。徙主簿以居之。而主簿更得廩。乃故鹽廩。藉溼支傾。殆不可居。然閱百二十年。爲主簿者凡幾人。至君乃更新之。不亟不徐。不侈不陋。不費所公。不斂於民。竹箇木章。瓦甃丹堊。不蠹不苦窳。不漫漶。堂後舊有池。自君來。比二歲。產異蓮。駢跗。邑人謹傳。以爲君且通貴之祥。相與名其池上之亭曰雙蓮。君故不喜怪。而邑人之意如此。亦足知其得民也。君與予之子子虞遊。乃因子虞請記歲月。予不得辭也。昔我藝祖肇造區夏。當乾德六年二月癸亥。嘗詔郡縣吏代歸者。皆上其官舍敝壞。或興葺之數於有司。以爲殿最。於庠。祖宗明詔。具在汗簡。而近世乃有相戒以爲非急務。且徒速謗者。獨安取此哉。予嘗備太史牛馬走。獲窺金匱石室之藏。故敢併記之。以曉他在仕者。嘉泰元年十月二十七日。中大夫直華文閣山陰縣開國男食邑三百戶致仕陸某記。

婺州稽古閣記

大觀二年九月乙丑。天子旣大興學校。舉經行之士。於是詔天下州學經史閣。皆賜名稽古。婺州稽古閣

者本以閣之下爲講堂。而閣用大觀詔書易名。紹興中。學廢於火。及再建講堂。雖復其故。不暇爲閣。至嘉泰元年。太守丁公逢。乃卽講堂後得舊直舍地以爲閣。而請於今參知政事許公大書其額。公書宏偉有漢法。於是閣一日而傳天下。丁公旣代去。曾公稟來爲郡。閣之役尙未旣也。於是窗戶闌楯。瓦甃髹丹。粲然皆備。又爲兩廡。達於講堂。高廣壯麗無遺力。南山在其上。雙谿在其下。煙雲百變。朝暮獻狀。閣之後有仰高堂。舊祠資政宗公澤尙書梅公執禮中書舍人潘公良貴。三公皆郡人。有忠義大節。而祠庫陋且弗葺。曾公微而大之。始奕奕與閣稱。曾公以邦人之請。及州學教授潘君夢得所斂。移書史官山陰陸某。願記其始末。時方修孝宗光宗兩朝實錄。業大事叢。而奏篇有程久乃能如曾公之請。夫堯舜禹臯陶。書紀其事。雖不同。然未嘗不同者。稽古也。稽古必以書。前乎堯舜之書。其易之始。畫與典墳乎。易之畫。幸在至今。而三墳五典。自楚倚相以後。不聞有能盡讀者。世所共歎也。雖然。今讀易不能知伏羲之心。讀典謨不能知堯舜禹臯陶之心。雖典墳盡在。亦何益於稽古。故予以爲士能玩易之畫。與身親見虞義等。反覆盡心於典謨。與身親見堯舜禹臯陶等。能親見聖人而不能佐其君。興聖人之治理。豈有是哉。士之放逸惰偷。不力於學者。固所不論。學而不親見聖人。猶未學也。親見不疑。而不用於天下。則有命焉。進則不負所學。退則安吾命而無愠。斯可仰稱大觀詔書。與賢守復閣之意矣。士尙勉之。嘉泰二年閏月二十五日。中大夫直華文閣提舉佑神觀兼實錄院同修撰兼同修國史陸某謹記。

智者寺興造記

婺州金華山智者廣福禪寺。浮圖氏所謂梁樓約法師道場。國朝開寶九年。始爲禪寺。自淨悟禪師全肯

傳三十七代。二百餘年。至慶元之五年。而仲玘實來。方是時事廢不舉。地蕪不糞。棟橈柱腐。垣斷甃缺。若不可復爲者。玘植杖而四顧。曰。智者之爲寺。天造地設者至矣。而人事不能充焉。故寢壞至於此。天其使我興此地歟。乃諏諸爲地理學者。則其言與玘略合。蓋寺在金華山之麓。峰嶂屹立。林岫間出。日月映蔽。風雲吞吐。而前之形勢無以留之。如王公大人南嚮坐帷幄中。宜其前有列鼎大牲之養。盛禮備樂之奉。賓客進趨。擯相齋翼。將吏武士。執轡執何。然後爲稱。今乃巍然獨坐。而侍衛者皆奔趨而去。則其威重無乃少損乎。於是始議鑿大池。瀦水於門梁。其上通大路。而增門之址。高於故三之二。異時所謂奔趨而去者。皆肅然就列。恪然執事。則王公大人之尊。於是始全。則其施置建立。號令賞罰。亦何可少訾邪。方議之初。或謂門有大木數十。必盡去。乃可興池役。而木所從來久。以是未決。忽一夕大風。木盡拔。若有鬼神相其役者。其亦異矣。玘之來。百役皆作。修廊傑閣。虛堂廣殿。至於棲衆養老之室。庖湑帑庾之所。繚爲垣牆。引爲道路。莫不美於觀。而便於事。後雖有能者。無以加焉。玘有道行。爲其後所宗。而才智器局。又卓然不凡。如此。故薦紳多喜道之。予又與有夙昔。且嘗記其嚴州南山興造之盛。故玘今又從予。求作智者興造記。而予友人寧遠軍節度使提舉佑神觀姜公邦傑。復以手書助之。請未及屬稿。而邦傑歿。予尤感焉。雖毫不敢辭也。今茲之役。池爲大。故書之特詳。嘉泰三年十月二十九日記。

常州奔牛閘記

岷山導江。行數千里。至廣陵丹陽之間。是爲南北之衝。皆疏河以通餽餉。北爲瓜州閘。入淮汴。以至河洛。南爲京口閘。歷吳中以達浙江。而京口之東。有呂城閘。猶在丹陽境中。又東有奔牛閘。則隸常州武進縣。

以地勢言之。自創爲饒河時。是三閘已具矣。蓋無之。則水不能節。水不節。則朝溢暮涸。安在其爲饒也。蘇翰林嘗過奔牛。六月無水。有仰視古堰之歎。則水之苦涸固久。地志概述本末而不能詳也。今知軍州事。趙侯善防字若川。以諸王孫來爲郡。未滿歲。政事爲畿內最。考古以驗今。約己以使人。裕民以束吏。不以難止。不以毀疑。不以費懼。於是郡之人僉以閘爲請。侯慨然。是其言。會知武進縣。丘君壽雋來白事。所陳利病益明。侯旣以告於轉運使。且亟以其役專畀之。丘君於是凡閘前後左右受水之地。悉伐石於小河元山。爲無窮計。舊用木者皆易去之。凡用工二萬二千石二千六百錢。以緡計者八千米。以斛計者五百。皆有奇。又爲屋以覆閘。皆宏傑牢堅。自鳩材至訖役。閱三時。其成之日。蓋嘉泰三年八月乙巳也。明年正月丁卯。侯移書來請記。予謂方朝廷在故都時。實仰東南財賦。而吳中又爲東南根柢。語曰。蘇常熟。天下足。故此閘尤爲國用所仰。遲速豐耗。天下休戚在焉。自天子駐蹕臨安。牧貢戎贄。四方之賦輸。與郵置往來。軍旅征戍。商賈貿遷者。途出於此。居天下十七。其所繫豈不愈重哉。雖然。猶未盡見也。今天子憂勤。恭儉以撫四海。德教洋溢。如祖宗時。齊魯燕晉秦雍之地。且盡歸版圖。則龍舟仗衛。復沂淮汴以還。故都百司庶府。熊羆貔虎之師。翼衛以從。戈旗蔽天。舳艫相銜。然後知此閘之功。與趙侯爲國長慮遠圖之意。不特爲一時便利而已。侯吾甥也。請至四五不倦。故不以衰耄辭。三月丙子。太中大夫充寶謨閣待制致仕。山陰縣開國子食邑五百戶。賜紫金魚袋。陸某記。

盱眙軍翠屏堂記

國家故都汴時。東出通津門。舟行歷宋亳宿泗。兩隄列植榆柳槐楸。所在爲城邑。行千有一百里。汴流始

合淮以入於海。南舟必自盱眙絕淮，乃能入汴。北舟亦自是入楚之洪澤，以達大江。則盱眙實梁宋吳楚之衝，爲天下重地。尙矣。粵自高皇帝受命，中興駐蹕臨安，歲受朝聘，始詔盱眙進郡，除館治道，以爲迎勞宿餞之地。而王人持尺一牘，懷柔殊鄰者，亦皆取道於此。於是地望益重，城郭益繕治，選任牧守，重於曩歲。及吳興施侯之來，爲知軍事也。政成俗阜，相地南山，得異境焉。前望龜山下，臨長淮，高明平曠，一目千里。草木蔽虧，鳧雁翔泳，蓋可坐而數也。乃築傑屋，衡爲四楹，縱爲七架。前爲陳樂之所，後有更衣之地。而傍又有麗牲擊鮮，與夫吏士更休之區。翼室修廊，以陪以擁，斲削髹丹，皆極工緻。屨二十有六間，而堂成。旣取米禮部芾之詩，名之曰翠屏。且疏其而勢於簡，繪其棟宇於素，走騎抵山陰澤中，請記於子。侯與予故相好也。予聞方國家承平時，其邊郡遊觀，有雅歌之堂，萬柳之亭，以地勝名天下。雖區脫間，猶能詠歎，以爲盛事。然嘗至其地者，皆謂不可與淮水南山爲比。翠屏之盛，又非雅歌萬柳可及，則亦宜有雄文傑作，以表出之。而予之文不足稱也。雖強承命，終以負愧。侯名宿，字武子，於是爲朝散郎直祕閣，開禧元年春正月癸酉記。

上天竺復菴記

嘉泰二年，上天竺廣慧法師築退居於寺門橋南，名之曰復菴。後負白雲峯，前直獅子乳竇二峯，帶以清溪，環以美箭嘉木，凡屋七十餘間，寢有室，講有堂，中則爲殿，以奉西方像。殿前關大池，兩序列館，以處四方學者。炊爨滂浴，皆有所。床敷巾鉢，雲布鱗次，又以爲傳授講習，梵唄之勤，宜有遊息之地，以休其暇日。則又作園亭流泉，以與學者共之。旣成，命其弟子了懷，走山陰鏡湖上，從子求文，以記歲月。予告之。

曰。進而忘退。行而忘居。知趨前而昧於顧後者。士大夫之通患也。故朝廷於士之告歸。每優禮之。而又命有司察其尤不知止者。以勵名節而厚風俗。士猶有不能決然退者。又况物外道人。初不踐是非毀譽之途。名山大衆。以說法爲職業。愈老而愈尊。愈久而人愈歸之。雖一坐數十夏。何不可者。如法師道遇三朝。名蓋萬納。自紹熙至嘉泰十餘年間。詔書褒錄。如日麗天。學者歸仰。如泉赴壑。非有議其後者。而法師慨然爲退居之舉。傾竭囊裝。無所顧惜。雖然。以予觀之。師非獨視天竺之衆。不啻弊屣。加以歲年。功成行著。遂爲西方之歸。則復菴又一弊屣也。死生去來無常。予老甚矣。安知不先在寶池中。俟師之歸。語今日作記事。相與一笑乎。開禧元年三月三日記。

東籬記

放翁告歸之三年。闢舍東葦地。南北七十五尺。東西或十有八尺而贏。或十有三尺而縮。插竹爲籬。如其地之數。墾五石。益瀦泉爲池。植千葉白芙蓉。又雜植木之品若干。草之品若干。名之曰東籬。放翁日婆娑其間。掇其香以臭。擷其穎以玩。朝而灌。莫而鋤。凡一甲坼。一敷榮。童子皆來報惟謹。放翁於是考本草。以見其性質。探離騷。以得其族類。本之詩爾雅。及毛氏郭氏之傳。以觀其比興。窮其訓詁。又下而博取漢魏晉唐以來。一篇一詠。無遺者。反覆研究。古今體制之變革。間亦吟諷爲長。謠短章。楚調唐律。酬答風月。煙雨之態度。蓋非獨娛身目。遣暇日而已。昔老子著書末章。自小國寡民。至甘其食。美其服。安其居。樂其俗。鄰國相望。雞犬之聲相聞。民至老死不相往來。其意深矣。使老子而得一邑一聚。蓋真足以致此。於虜吾之東籬。又小國寡民之細者歟。開禧元年四月乙卯記。

嚴州釣臺買田記

嘉泰四年詔以嚴州久不治命朝散郎直祕閣浙西路安撫司參議孫公叔豹爲知州事公至數月州以大治聞獄無淹繫庭無滯訟幙府閑暇符檄簡少榜笞之聲不聞於屏外向之逋賦佚罰皆以時舉倉有餘粟府有餘帛公天資近道不樂燕遊歌舞優戲之奉又不喜以土木無益之事勞其民治事少休則宴坐別室自夜至旦盥饋而出終歲如一日獨念初赴郡過七里瀨漢嚴先生釣臺下讀唐興元中崔儒釣臺記以爲上有平田百畝足以力耕下臨清流足以垂釣今投釣之地具在而田則亡有乃以屬縣令訪之則田亦具在旁有流泉雖大旱不竭可給灌溉而或者輒有之公乃遣語以當歸田直而取田以爲先生歲時祭享之奉其人難之公歎曰光武欲與先生共天下而先生不屑也千有餘歲後吾乃欲必取百畝之田以奉祀事乎且吾教化未孚而遽望人以輟耕遜畔難矣因置不問會有沒官田又從傍買民田足百畝除其泛科斂以畀浮屠之奉祠者又卽祠之右創爲佛院棲鐘於樓匱經於室僧廬客館略皆有所度歲入可以食其徒七人而樵汲之役又在其外則先生之祠可以永世不廢乃礪美石請記於予予曰嚴名城也自大駕巡幸臨安以朝士出守者與夫入對行殿被臨遣而來者大抵多取道於富春入謁亭下有高山仰止之歎而恨祠屋弊壞椒桂不以時薦往往咨嗟躊躇久而後去及其下車則日困於簿書米鹽將迎燕勞之事忽焉忘前日之言寒暑再更復上車去則又過祠下負初心戴愧面而去者袂相屬也聞孫公之舉得無少自咎哉予二十年前蓋嘗來爲此邦亦自咎者之一也故喜道孫公之舉且以勵來者云開禧元年十二月辛未太中大夫寶謨閣待制致仕山陰縣開國子食邑五百戶賜紫金魚袋

陸某記。

陸放翁集 二 渭南文集 卷二十

九十二

